



耳溪集 十七

謚狀

共二十二

~16  
2330  
17



和  
2330  
卷2-17

耳溪集卷三十七目

諡狀

吏曹判書李公諡狀

判敦寧府事趙公諡狀

吏曹判書逸菴尹公諡狀

禮曹判書致仕奉朝賀洪公諡狀

戶曹判書趙公諡狀

水原府留守贈左贊成趙公諡狀



Blank area with vertical lines for writing.



耳溪集卷三十七

諡狀

吏曹判書李公諡狀

公姓李諱宗白字太素本慶州人以新羅沙梁部大人謁平爲初祖羅麗之間世有冠纓稱鉅宗暨本朝工曹叅判延孫政府叅贊夢亮尤顯五世祖領議政鰲城府院君諱恒福勲業名節載國乘贈諡文忠世稱白沙先生高祖諱井男禮賓寺正曾祖諱時術吏曹叅判祖諱世弼以經術徵拜刑曹叅判諡文敬學者稱龜川先生考諱衡佐以蔭進治行著稱官至方

王溪集 卷三十一  
伯亞卿妣貞夫人坡平尹氏牧使趾慶之女以 肅  
廟已卯十月三日生公幼時明谷崔相公見而奇之  
曰體幹雖小精神過人他日必至宰相嘗拜明齋先  
生於鄉廬先生饋以粟飯菜羹曰此人將大有爲可  
使知生民艱難辛丑中司馬兩試癸卯擢增廣丙科  
明年分隸承文正字夏拜 世弟侍講院兼說書間  
求爲金泉察訪未幾解歸丁未拜說書兼 肅廟實  
錄記事官秋薦入翰苑拜檢閱明年陞待教奉教時  
逆變起 上御南門訊囚賊發不道語 上震驚至  
於涕下公停筆仰瞻 上厲聲曰新進小官敢爾命

罷職公退伏曰自古史冊或稱上笑或稱上泣史臣  
必仰瞻故書 上嘉嘆不之罪秋移說書明年陞戶  
曹佐郎旋拜正言遞爲平安都事閏月選入玉堂吏  
曹錄拜副校理兼中學教授以村癘方熾民力不堪  
請寢 寧陵行幸尋兼東學教授校書校理 景廟  
實錄都廳九月 誕辰聯劄陳祈天永命之道附張  
九齡獻金鑑之義 優批賜近思錄冬以副修撰講  
東國通鑑論崔致遠從祀文廟之非且言關東驛站  
凋殘請以本道查得之田結分給列驛 上納之又  
明年拜獻納疏論宮房折受之弊尋移吏曹佐郎兼

漢學教授除北評事不赴拜正言以伯父忠定公在相職引呂公著范祖禹事乞免不許自是屢拜玉堂吏郎明年辛亥三南大饑命爲兩西船運御史明年竣還陞應教秋以違牌補康津縣監大臣白移漣川未幾以朝著乏人命內遷爲政數月民豎碑追思是冬監賑嶺南條奏賑邑褒黜得宜又請故叅奉李萬敷鄭葵陽贈職以勵士民故左尹郭再祐郡守趙宗道賜諡以風節義下廟堂施行又明年拜應教司諫掌樂正掌湖南左道試事明年拜司諫移司僕正三月改厝先妣尹氏於長湍五月拜校理引禮陳章請

終三月持服秋拜宗簿正執義奉命廉察咸鏡南道明年又以御史審理北關將行入對言信賞必罰卽人君勵世之具而近來賞罰多失平李倚天章牘之間語犯先朝輿僿尙且駭憤今雖以大需蒙宥其可擬議於銀臺近密之班耶宜責銓官拔望上嘉納之旣至北按犯越獄請設都會於鍾城等三邑試儒武宣告德意以慰邊民八月復命擢兵曹叅知移同副承旨三遷至左副出爲公洪監司首罷白地徵稅禁魚箭鹽盆之立案收稅者盡刷鄉豪講院緇徒之逃官役者狀請均役明年冬以親年來歲滿七旬

五溪集 卷三十一  
六上章乞解明年春以大司諫召還歷禮曹兵曹叅議判決事屢入承旨明年拜大司成冬爲養求爲廣州府尹明年秋內遷敦寧都正命仍又明年冬適拜禮曹移大司成復以養牧驪州又明年夏入吏曹叅議一日赴政判堂欲重通李倚天承旨而枳李公喆輔公曰倚天罪負何如而欲擬之喆輔文章直道上所倚重而塞之何也判書持之不得遂從公言自是屢移他職明年復入吏曹以親老自注楊州牧明年入爲戶曹叅議又明年以承旨移吏曹又明年陞拜刑曹叅判遷禮曹兼備堂俄拜大司憲命適使專

管備局秋歷漢城右尹兵曹叅判兼同經筵同義禁明年夏遭父憂戊辰外除拜刑曹兼副摠管明年薦授平安監司 上以廣儲蓄修戎政尋人才結民心十二字遣承旨傳諭時關西大饑疫民顛連相屬彌滿平壤城中公疏請移三南海西穀及停身布戶役等事區劃調救條緒詳備別設賑所於永明寺流民日增幾至萬口無一捐瘠明年賑畢不請勞賞 上嘆曰方伯得人使予紓西顧之憂先是因朝令查出各邑隱結屬之均廳道內漏結查得者萬餘結公馳啓曰本道隱結太半是民庫需用今若一並括屬於

均廳則列邑公用不得不加斂於民結其勢自至於  
邑力日凋賦稅日繁至若山邑火田未經改量今若  
不下名色只以帳付餘數歸之隱結按例徵稅則峽  
邑薄田將不數年而陳廢矣廟議難之屢啓蒙允民  
邑賴焉明年辛未適特仍夏以吏曹叅判召還兼濟  
用提調時憲府有從氏梧川公安置之啓公上書言  
備擬臺官卽銓部事今日政席臣不敢冒處尋單適  
冬以戶曹叅判差 孝純墓都監堂上明年兼承文  
提調秋除咸鏡監司不赴冬拜都承旨明年又拜戶  
曹兼典設提調又明年夏差冬至副使赴燕歸裝蕭

然明年春復命夏以同義禁叅鞫公表從居春川者  
名出逮捕公請于委官曰以罪人至親義不可按獄  
上聞曰予當區處會畿伯缺命擬入顧大臣曰道臣  
亦得人公感激卽謝歸家泣曰 聖恩至此曷不以  
百口報萬一哉是秋畿內大歉公自備穀萬八千石  
殫誠賙濟家人薪米之資一不取給曰受國厚恩何  
可以家私累賑政耶三月 上幸墓所歷臨畿營特  
賜豹皮七月進秩資憲領相李公天輔薦白也俄命  
內移及新伯入辭 上諭以前道臣治規井井可一  
遵也拜知中樞兼知義禁移刑曹判書兼司譯提調



還差籌司槐院丁丑 仁元大妃 貞聖王后相繼  
升遐差 明陵 弘陵都監堂上秋陞正憲特除戶  
曹判書公奏曰各衙門田結自是屯田例當免賦出  
稅而今並與田稅許免以致國計漸縮摠計各軍門  
衙門免稅之數至爲二萬二千餘結乞依屯田例出  
稅 上可之明年秋特除吏曹判書兼同春秋典牲  
提調冬行都政退曰伯父暨從兄皆經一都政卽遶  
先君子嘗謂子姪曰人臣不可久處權要余豈忍忘  
之自是屢違政命梧川公適入侍亦以先訓白特許  
之除內局提調拜工曹判書是時 上違豫移直春

坊二十餘日 上日再御建功湯咳氣忽添醫官皆  
謂天香湯爲當劑而不敢請公曰明知當劑則豈可  
以違命爲難而不請改藥乎時尙魯爲都提調屢請  
改不聽末乃以天香湯改名香橘茶進御有效公奏  
曰所進非香橘茶卽天香湯也 上曰旣得藥路宜  
以天香湯改定公曰建功湯自 上命名故諱言改  
藥雖知天香之爲當劑而乃以香橘改名以進臣等  
之罪也以臣子敢欺 君父推此一事三隅可反尙  
魯變色 上罷公職時夜漏下二鼓退出及陞天黑  
無燭公積瘁氣億不敢趨下忽有從傍扶掖者公問

曰公是何人乃扶人殿前耶對云不敢言纔出門星  
隕於前從者皆恐還家疾甦猶日送人藥院問上  
候洪尚書鳳漢送醫來曰素知家貧藥無多少而我  
自當之但爲朝廷活賢宰相云明年己卯正月四日  
聖候差勝命藥院輪直以勞進公階崇政侍者入告  
公蹶然起曰聖候乃瘳實宗社之幸吾雖死何  
恨亟呼寫辭賞之章是日酉時疾革猶索帽加首北  
向辭闕曰主恩未報又問親候安乎言訖而卒壽  
六十一梧川公憑而泣曰君可謂殉國矣恨不得以  
吾身代也仍大慟而歸疾未甚亟後公八日而逝尚

魯卹公甚逝單久不得入後因下詢聞之驚悼下  
教曰此人自翰林任之久矣今於藥院浹旬焦心頃  
者所陳深悔處分矣凡贈賻其令從厚三月葬于長  
湍長北亥坐之原公雅性簡靜操履堅確居家篤於  
孝友早失慈母每以祿不及養爲至痛善事繼大夫  
人嘗稱孝子哉判書立朝則進盡忠言退持清議居  
官則盡心國事不營家私內秉銓衡外按雄藩居第  
朴陋服用澹素人不知爲宰相也至若愛君憂國之  
誠謹守白沙公家法嚮在壬癸之間賊臣魯禧用事  
宗國之憂凜然有難言者時梧川公以原任大臣退

處畿鄉嘗隱憂永念公慷慨言曰萬一天不祚宋吾輩隻手難支徒死無補彼獨一二兇人然耳謂見李宜叔議之歸而喜曰宜叔亦我輩心國家事不足慮宜叔卽李相國天輔字也於是同朝忠志之士矢志協力按壁不動賊勢遂益孤此皆平勃交歡而劉氏安之策也公乃能講定於同堂之內倡結於廊廟之間終底凶謀自沮 社稷有賴豈不偉哉嗚呼當時之事知者蓋鮮而梧川公純忠血忱久而乃彰公之志與事惟梧川公知之故死生訣別之際許之以殉國者良有以也公配贈貞敬夫人東萊鄭氏府使錫

圭女繼配貞敬夫人光山金氏贈叅議宗碩女男敬倫文科叅判出後梧川公敬存早歿二女長歸尹迪東次歸朴英秀敬倫子永生員女進士鄭履容妻敬存子永後尹迪東子益烈今校理朴英秀子尙榮敦榮彥榮不佞後進也自少獲私於梧川公屢拜公於公座私席容貌不及中人神彩動人舉止安詳言辭簡當知其中有所守矣及見晚節勤勞國事乃心王室跡雖未顯而功在不運不愧爲李文忠同堂之知己也今永老兄弟列公事蹟來屬易名之狀余何敢辭謹撰次其大節以告太常氏

判敦寧府事趙公諡狀

公趙氏諱遠命字致卿其先豐壤人高麗太師孟之後也入本朝有諱希輔斥賊臣爾瞻不仕昏朝官止西宮分承旨卽公高祖也會祖諱珩行禮曹判書號翠屏負重望爲名卿祖諱相抃縣監贈吏曹判書考諱祺壽直長有文短年贈左贊成妣贈貞敬夫人李氏麟坪大君諱潛女公以 肅宗乙卯降幼而警敏季祖東岡公甚奇愛之及長文藝夙成穎達絕輩類從祖弟豐陵公以儷文名世而推公爲不可及壬午中司馬庚寅擢增廣乙科分隸槐院除侍講院說書

陞成均典籍歷兵曹佐郎司諫院正言明年爲龍岡縣令邑素腴清淨爲治闔境謐如又明年適拜正言時科獄起公抗疏辨論請更窮覈忤時議削黜尋敘屢拜騎郎諫官輒以病解丙申選弘文錄有人論圈事違式削全錄庚子接慰倭使壬寅復錄拜修撰校理歷司書獻納吏曹郎兼司書西學南學漢學教授校書校理皆引義不出惟春坊實官除下卽謝每自胄筵退喜語人曰 睿學高明竊覩十數日間問難辨解頓覺日將實 宗社臣民之福以故必經旬侍講不忍替直除北評事不赴由檢詳陞舍人兼弼善

輔德以兄弟同院辭歷軍資監掌樂院正成均司成  
司諫執義應教以御史赴江都試才甲辰 英廟御  
極首擢同副承旨陞至右承旨以雷異陳戒曰宮闈  
舊供宜加節省以昭儉德臣下驅使宜養廉耻以存  
大防 上嘉納焉冬明正逾賊鏡虎之罪其黨明誼  
輩方在院議將覆逾公正色折之因拂衣出遂辭遶  
拜兵曹叅知明年拜吏曹叅議違召罷出東郊時朝  
著大變或黜或削公之親友多居近郊往來觴詠輒  
邀公公既習靜自適雖林下文酒之會亦辭不赴丁  
未秋拜禮曹叅議移戶曹又移吏曹以同堂兄弟相

代引義遞其後屢除黽勉暫出而不過數三叅政而  
遞拜工曹叅議時以良役變通 上御宣政殿進諸  
臣詢當否公奏曰結布戶布之論自古甲乙互爭然  
結既有稅又令出布則是加賦也戶口多寡不齊徵  
稅無別則是不均也惟口錢差可上自貴近下至庶  
民計口出錢通行京外則不至驚擾難行欲救錢荒  
則楮幣布幣皆不可復惟有加鑄而已尋拜副提學  
歷判決事大司成兵曹叅議明年擢拜開城府留守  
歲大歉捐廩全活者數千人改量田正經界而官自  
支費不以煩民松人鑄鐵以頌惠瓜遞明年辛亥遷

長陵以敦匠勞陞嘉義明年又爲副提學又明年薦授咸鏡監司首釐田蔘之弊民賴以安咸興有萬歲橋跨十里歲調民構繕一邑受病公出官錢取息備役留緡錢萬餘儲民庫以備不贍明年因事坐罷尋敘歷大司諫大司憲都承旨漢城左右尹戶禮兵刑工曹叅判嘗以籌堂登筵時有更張之論羣言迭進公默然上顧問曰卿何獨無言對曰古語云毋變舊毋作新臣只知率舊無愆而已上深然之丁巳拜吏曹叅判夏薦拜平安監司時聞北使將至倍道馳赴供億有條公私節省別備白金四萬兩藏之泉

流庫又出數千金助成一路嫁娶之過時者甫九月罷歸敘拜副學都憲知申諸曹叅判兼籌司堂上副摠管同知經筵義禁府春秋館成均館事承文院社稷署尙衣院觀象監內贍寺典設司提調公素恬於榮進及貴顯益思斂止而患視不良不堪強策自解西符營小屋於楊州之白石里鑿池蒔花以終老凡有除拜皆以病辭至歲甲子公年七十以子載德官侍從推恩陞資憲入耆社拜漢城判尹歷工曹判書知中樞府事是歲英廟遵肅廟故事躋耆社加諸耆臣秩陞正憲上幸社公病不能叅伏路左特

耳溪集 卷三十一  
命扶掖以入頒示 御製歌詩公與諸者臣賡進丙寅以 仁元大妃寶齡六旬又推恩陞崇政拜判敦寧府事已巳拜議政府左叅贊五月九日卒于正寢祭賻庀葬如例公慈仁孝友早失怙恃終身茹痛季父后溪公年高郊居事之如父每遇美味必先致之時節製衣服以獻尤致虔祭祀既耄或病未將事則攝衣起坐待告徹教育三弟皆至成立急人恤窮出於真誠釋褐之初當辛壬之際時事極艱拒絕凶黨閉門自靖甲辰以後半朝勩投合時宜公則只知盡心事君不爲冷熱得失動心故當羣凶鷓張之時

旣以緩而見擯及親戚貴盛之日反以峻而見疑蓋所謂世人無常而徐公有常也不入睢盱之場不主言議之柄惟以進取爲戒歛退爲心故立朝五十年歷敷清顯致位崇峻而令名介操終始無瑕歷西北雄藩而歸裝蕭然踵公按西者雖素不悅咸曰一鞭出大同門者惟趙某一人嘗曰我非欲清白也以官物施土人無惜而與私人則於心不安故不能濫用也家居不畜姬侍素屏紙帳終日宴坐晚節得眼病幾不辨子孫而七情不役精神內旺終享遐齡韶顏皓眉見者以爲老仙方病革欲見豐原公遣人促之

至則勉其竭忠報主無一言及私豐原公出而泣曰  
素知兄乃心忠國臨歿之言果然矣嘗自著銘曰性  
本過慈不尚苛嚴而仁恕則未少也善病不狎聲色  
而修飭則未畧涉宦海不至助瀾而激揚則未出莅  
外藩不過居簡而清白則未杜門養拙不喜交遊而  
高尚則未引疾歸田不樂供仕而恬退則未我守我  
法不逐時好而貞確則未隨遇隨安不求人知而卷  
懷則未卽公自敘而可槩其平生矣夫人沈氏青松  
大姓通德郎冲之女二男皆文科載德弘文館校理  
載厚侍講院文學四女適判書李春躋都正尹得運

縣令崔守身領議政尹東度校理子鼎鎮戶曹判書  
文學繼子彛鎮李五子昌儒叅判昌佐昌伋承旨昌  
任大司諫昌倫尹無後崔二子弘簡左從史弘靖縣  
監尹繼子光裕牧使鼎鎮五子縣監雲綱雲繪雲繼  
雲緒雲紹一女歸應教鄭東觀彛鎮一子雲圭內外  
孫曾不盡錄良浩晚生也未及躡公後塵望見儀容  
而竊聽於士大夫之論近世公卿之清慎恬介舉翕  
然推公無異辭及與公季子文學孫判書遊益知其  
居家制行之篤謹立朝持論之公平尙見其遺風餘  
韻未嘗不嗟歎嚮慕今雲綱具公事行來徵易名之



狀謹撮其表表著明者撰次之以備太常氏之採焉

吏曹判書逸菴尹公諡狀

公姓尹氏諱德駿字邦瑞鼻祖高麗西京留守威以平賊功封南原伯子孫因以爲貫其後代有簪纓至典書璜當革國退而不仕與圃冶諸先生齊名號後松本朝贈諡忠簡觀察使臨仕我朝選廉吏孫諱文科郡守 端宗遜位之日佯狂浮海杜門自廢貞忠大節載 莊陵誌孫剛元文科判校罹戊午士禍官不顯寔公高祖也會祖諱祁魁文科官止僉知登海東名臣傳祖諱天衢官同敦寧本生祖諱衡覺官通

政牧使卽觀察公第三子之後敦寧公無嗣取牧使公子諱攀爲子官觀察使以公貴贈贊成卽公之考也妣韓山李氏吏曹叅判廷夔之女以 孝廟戊戌生公幼而聰穎過人時稱神童鄭公太和一見奇之妻以孫女弱冠通經籍文辭捷給 肅廟己未擢庭試第三名時年二十二入起居注筆翰如飛在禁直與崔明谷錫鼎諸公酬唱頡頏人皆驚歎被翰薦以同薦人之被論薦未完辛酉陞典籍轉兵曹佐郎入臺省初拜正言也發啓爭國舅閔維重之仍帶兵判上嚴批坐罷驪陽終亦辭遞在持平也疏論金益勲

之援訂者既以誣罔伏法益勲不可獨免其罪不報  
尋以接慰官往萊府隨機制變殊俗戢服方伯尹公  
趾完亟稱之壬戌選知製教癸亥夏被瀛選拜副修  
撰秋除北評事甲子春拜副修撰因天災進戒極言  
敬天典學立志之道 上優批答之乙丑拜副校理  
時儒生金盛大等挾摘明齋尹公書中一句語謂之  
誣逼先賢發文詆辱四館金洪福等發簡罰儒生大  
臣以先啓不靖之端請罪四館副學崔公錫鼎疏卞  
尹公本心因救四館 上以敲撼大臣下嚴教罷崔  
公職公半夜求對備陳尹公被謗及士習不端之弊

仍暴崔公疏非出敲撼之意 上特命推考九月丁  
贊成公憂丁卯服闋拜副校理修撰陳疏乞養 上  
以經幄乏人優批不許命賜衣資食物蓋特恩也公  
進箋謝冬登夜對下 御製一絕命諸臣賡進公獻  
詩曰夕露侵軒濕未晞詞臣霑醉更遲歸從容上下  
規箴地咫尺 天顏正不違 上覽而嘉之兼校書  
校理南學教授轉吏曹佐郎又拜校理時有濫乘屋  
輪入闕者公見而駭之聞持平李公益壽詣臺遂簡  
通之李公卽令府隸撞碎屋輪於臺廳前 天威大  
震罷李公職而有名官指嗾之 教下府隸于法曹

耳溪集 卷三十一  
至於杖斃公陳劄首實請同被其罪又言新生王子未及十日加給職田事曰王子長成不患不富豈可以預慮其貧而加給乎退而又上劄以理慾二字反覆陳戒留中不下已已以中批起金德遠等正言李公益壽啓請還收 上責以伐異而遞李公職公陳疏救拜吏曹佐郎陞禮賓寺正時朝廷有大進退公之伯父承旨公以營救尤菴宋公謫海南繼斥公爲高山察訪秋以病罷歸奉大夫人屏居光教山丙舍口不言時事以詩酒自娛癸酉敘拜鏡城判官公積忤當世再被譴黜而夷然就途及到官興弊蘇殘邊

民賴安甲戌四月改紀初拜校理陞副應教疏請歸覲病母命賜藥物轉應教兼 世子侍講院輔德移舍人以親病再疏乞終養 上批以將母上來乙亥春以兼春坊叅 世子入學禮移司諫兼備局郎廳除執義五月擢拜同副承旨移大司諫時有權大運放釋還收之啓公以大運年過八十竄逐炎荒已經一年使之歸死田里不害爲寬大之典以崖異公議適職拜禮曹叅議右副承旨丙子拜刑曹叅議夏除舒川郡守寬簡爲治丁丑冬罷戊寅敘拜兵曹叅議歷右承旨戶曹叅議己卯復拜大司諫以縣道陳疏

言大侵毒癘經閱屢歲八路生靈死亡過半爲國之道在節用愛民而工役不輟於闕內此是 殿下役心於玩好也又言別軍職卽 孝廟入藩時褊裨也扈衛軍官卽癸亥反正時從義者也局出身卽南漢捍衛之士也今則歲久人亡名實不稱廩祿太廣服飾過侈並宜革罷各營各鎮水軍之散在山峽脫有緩急難以得力之狀未乃結之以戚臣之不宜典兵縷縷四五千言皆不報九月又拜大司諫以前疏之不見採用戚臣對疏之過加疑怒引嫌辭適冬拜工曹叅議庚辰拜大司成疏請嚴科場禁厚紙適拜兵

曹叅議大司諫尋拜吏曹叅議旋移工刑曹叅議冬復拜大司諫陳疏言妖巫賤婢不宜親自詰問以損人君之體仍言姜世龜之疏語不擇發誠如 聖教還給足矣竄之嶺海寧不過重年過七十廢仕居鄉之人安有利害之念耶卽今第一急務惟在保護東宮所謂保護者不但寢食起居而已亦宜慰其情懷張氏之喪雖不敢就哭宜於葬時別遣宮官護喪以報誕育之恩也希載之容貸業同之緩治其時大臣誠有錯事之責其心則斷斷無他日昨 聖教誠是聖人精義之言也仍救領敦寧尹趾完以私書被

合啓事及吳道一之以閔彥良事不可混被竄配之請 上以疏語未知其一 一得當爲批壬午春正言金相稷以公深攻近日臺啓請罪 上以公疏中何必親鞫之說極可駭異罷職癸未西敘甲申除安東府使邑有土豪蔣姓人山訟其人有所挾理屈而百計圖伸公以法痛繩置之落科丙戌擢拜本道觀察使以蔣訟事大忤揆地再疏辭遞拜禮曹叅議丁亥拜吏曹叅議移大司成旋拜吏議兼承文備局副提調皆堂上官峻選也又兼東文選纂修堂上冬遞拜戶曹叅議冬復拜吏議乞養爲驪州牧使領相崔公

錫鼎以公前赴嶺邑已遂便養見今所帶俱要職不可外遷筵白還寢戊子復拜吏議四月薦授咸鏡監司辭陞時陳北路守令久任之宜及商稅還屬本營事皆蒙採施公凡四入北路區畫措置咸得其宜一道賴之已丑以親病四疏得適拜刑曹叅判大司成同知經筵事吏曹叅判兼奉常平市提舉先是崔公錫鼎撰禮記類編不悅者以誣賢鑿經合啓請罪朝議以爲合啓非出公論叅啓諸人並停望公行政不分首從一向枳塞有非調停之道首發數人外漸次甄通庚寅春正言韓永祚以排擯異已杜塞公議論

王深集 卷三十一  
斥銓地公陳疏辭適拜大司成爲叅進宴入京旋移  
吏叅以彈墨之未乾力辭不獲暫出叅宴以親病還  
鄉辭適連拜禮工兵三曹叅判兼同知義禁府事移  
大司諫秋復拜吏叅兼 世子右副賓客司譯提舉  
副摠管適付西樞時北谷忽來朝野震恐公陳疏水  
陸戰守之策及詰戎偵賊之要十八條末乃結之以  
得人才破朋黨節財用振紀綱 上優批嘉獎辛卯  
春復拜吏曹適拜掌隸院判決事觀象監提舉時有  
北漢築城之議公於筵中陳白北漢地形險窄脫有  
駐蹕之時許多軍馬實難容接與其悔之於後不若

始初之詳審也三月以特旨擢拜刑曹判書曹多疑  
訟久不決公一按文簿立卞在直裁決如流於是定  
郎吏久任之法練習曹務疏通幽鬱一曹肅然適拜  
漢城判尹右叅贊禮曹判書公陳疏引病 批旨有  
年齡未衰昔病宜蘇之教時以爲榮壬辰拜京畿監  
司八月拜吏曹判書公以亞銓時屢遭顛沛四疏力  
辭適拜右叅贊判尹禮判兼都摠管 世子右賓客  
癸巳拜工曹判書兼宗簿提調夏奉璿源錄往藏于  
沁都時 肅廟在宥四十年廷請稱慶上尊號公獨  
上疏畧曰今茲尊號之議十餘年來陳請者甚多

殿下輒斷然揮斥此實盛德事也臣愚以爲將順斯美以彰抑損之實則傳之史冊必增其光比之數字微稱豈不相懸哉 上優批答之儒生趙廷豪投疏論公立異大禮辭語危險 上命竄廷豪於絕塞公上疏引罪適拜刑判夏差伴送使因事坐罷甲午敘拜大司憲先是臺臣鄭壽期論宰臣鄭澔痼黨之習其後持平權焜追發壽期削黜之請公疏救壽期於是焜盛氣引避公亦引適除知中樞都摠管知春秋乙未復拜刑判知義禁知春秋時有闕門掛書之變一隊士流皆入其中而公名亦在焉公自鄉廬倉黃

進伏城外則先已有諸臣勿胥命之命公陳疏請罪公自中年以後倦於進取漸謀就閒及遭掛書之變益無意於從宦且以親年八旬仍請乞退 上溫批慰解丙申春復拜吏判以特旨擢拜判義禁公縣道陳章 上以東銓首席不可久曠今茲寵擢亦非偶然爲 批公不獲已進詣闕外陳疏 上不許至有念君臣大義之 批終不出膺知舊相愛者亦以處義之太過互相勸起公自以疎逃之臣蒙不世之遇銓長之除金吾之擢一時並萃已極滿盈之懼而且念朝象不靖調劑無望不宜冒當疏凡六上首尾三

朔 上亦嘉公所守而諒其終不可強許解長銓四月移左叅贊兼判義禁時有壬辰科獄辭多株連人皆厭避公慨然出膺究覈端緒務盡平允七月有大處分公以金吾查事被削黜還鄉丁酉 上猝下非常之教舉國震駭公蹶然驚起曰吾世臣也義同休戚不可以身有罪名而默無一言以負國恩立草一疏激切懇到拜辭大夫人半夜馳到城外繕寫將上聞尹公趾完先已入對反汗疏不果上而其臨大節不計禍福如此是年十一月十一日以宿患者終于光山寓舍享年六十臨終以國恩之未報孝事之未

終爲恨訃聞特命給牒翌年春權窆于果川先塋下後遷于高陽見達山下向坤之原配貞敬夫人東萊鄭氏知敦寧府事載岳之女生與公同年後公二十三年而歿與公同壙舉一男熙啓郡守有一女無嗣取三從弟諶子昌憲爲後又無子取同宗弟昌洙子珩爲後公器度端凝神采瑩澈行方而識周辭約而理明妙齡決科際遇明時出入經幄遇事直前語多觸忤咫尺前席時承嚴旨而不少摧沮盡言無諱主知之深結蓋由於此而時值士類分朋之際獨持清議不以利害動心亦未嘗自立標幟每叅銓席通



塞取舍一循公議惟以消融保合爲期歛跡名塗不  
事馳逐築室山樊左圖右書栽花移竹嘯咏自適每  
有除命旅居京第 聖眷采隆恩擢荐降而居寵若  
驚操履愈堅嘗曰從古人臣之取禍皆由於堯攬權  
勢貪戀而不知止自在小官難進易退是以立朝四  
十年名德無玷至於辭銓衡一節譚者比諸君實之  
不拜樞密當官處事謹守法度綜理纖密置水不漏  
性至孝居贊成公憂致毀幾滅性朴公泰輔來吊而  
心服及服闋朴公時秉銓筆以公善居喪首薦自代  
奉大夫人備極志物之養每日必晨興省寢或以公

年紀之向衰請少休公曰人子事親之誠不可以老  
少有間也聰明絕人經史百家無不淹貫尤詳於國  
朝典禮爲文章信筆立書詞理俱到詩亦簡雅多趣  
而不以文學自居有詩文雜著若干卷藏于家工於  
楷草篆隸一時士友家金石之刻多出公手崔良齋  
奎瑞祭公文曰孝友之行仁恕之德敏達之才通明  
之識堅貞之操公平之議求之今世孰有倫比此可  
以觀公之平生也良浩邈然後生也嘗聞先輩言稱  
公爲近世名流而立朝事蹟耳目皆不及謹就李忠  
正公彝章所爲狀撰次其大節以備易名之考焉

禮曹判書致仕奉朝賀洪公諡狀

公諱重孝字聖源姓洪氏肇自麗季居豐山國學直學諱之慶爲上祖是生舍人諱侃文章名世號洪崖密直使諱侑大提學諱演兩世大顯曾孫即將諱龜退居高峰縣當國革四世不仕至大司憲諱履祥以德行經術爲 穆陵名臣號慕堂諡文敬卽公高祖也會祖諱霽南原府使贈左叅贊祖諱柱文禮山縣監贈戶曹叅判考諱萬紀右副承旨贈吏曹判書妣原州李氏通德郎說之女以 肅廟戊子生公器宇雋異見者期以遠大早孤劬學十八魁鄉解中進士

庚申中增廣會試遂魁殿甲例付成均典籍辛酉除兵曹佐郎正郎壬戌拜正言 上朝謁 南殿屬癘氣熾大臣諸宰迭請停行不許靈城君朴文秀大言力爭 上始從之笑謂大臣曰靈城入來固知尼予行矣公進前曰人主聽言之道當觀其當否而從違諸臣之齊聲豈下於文秀一言而下 教如此臣竊惜之 上曰言甚得體矣癸亥除侍講院文學尋拜吏曹佐郎八月以敬差官檢災湖左甲子六月選入都堂錄拜校理修撰每入講筵因文進戒至木牛流馬之製奏曰名物度數非所先務當以不得諸葛亮

耳溪集 卷三十一  
爲憂 上善之尋移正言論嚴宅周背父欺君之罪  
宅周者全義縣吏子也本名李萬江變姓名占科第  
滅倫欺世人無言之者後宅周杖斃於鞠獄時有都  
城修築之議公謂王者守在四境方今春而虹貫夏  
而下霜宜靜而不宜動上疏請寢以親年近八十陳  
疏乞養九月得永同縣監冬與道伯爭體例坐罷丙  
寅敘差接慰官赴萊館却書啓之違式禁單蓼之換  
劣倭人爲之憚服竣還拜副修撰兼東學教授陳疏  
乞歸養 上還其章是後連除修撰正言持平掌令  
獻納俱不拜九月丁憂已巳服畢以修撰入侍講聖

學輯要 上曰 景廟朝有一儒臣斥栗谷以異端  
而故宰臣吳光運獨稱先正矣彼儒臣議論何如公  
對曰臣高祖臣履祥與先正道義相與輓詩傳于世  
故臣祖子孫無敢斥先正 上曰今日君臣始知心  
矣在直時值內三廳試射軍號晏頌公因夜對陳戒  
曰古稱皇帝在宮中言動起居必令經筵官知之今  
日試射或云殿庭陳角觝之技誠有是者殆近玩戲  
恐非所以示 東宮也後入侍 上記前言稱其賢  
七月除北評事時北路荐饑多過時不婚者檄諭列  
邑使門地敵者擇對成禮旬月之間嫁娶者凡四十

王溪集 卷三十一  
餘人冬遞還辛未除弼善尋移掌令以違牌謫茂朱  
九月宥還癸酉除校理登講筵論奴婢世役之弊又  
陳常賤早寡無子女者當許改嫁勿令屬公時因李  
光佐諸人追奪事三司發啓已四五年人皆規避不  
停不連作一機穽時議必欲驅屬於公公念義不可  
苟合而喪守又不可緘口而取侮乃上書畧曰今三  
司之間機弩互伏臺諫具則玉堂不入玉堂備則臺  
諫不進臣是色目外人落席於滄桑旣變之後釋褐  
於劫灰已冷之餘本無恩讎誰有愛憎若不早自引  
避畢竟路窮勢隘袒左則劉氏喜而呂氏怒袒右則

呂氏感而劉氏怨終不免寄食東家托宿西家將何  
藉手而事 邸下乎於是謗怒喧然應教韓光會以  
疏中數句引喻乖當奏請罷職持平趙宗溥又請永  
刊仕籍 令旨不許自是連住鄉廬甲戌 上臨筵  
教曰洪某疎野純實因用劉呂二字公然見枳矣可  
見中立不倚屢飭銓曹調用至丙子始除獻納陳書  
不就九月承召入城時有人告洪州海中有二島漏  
王稅者命公往查覈其島名之訛傳指告之非實仍  
發前後守宰之冒犯箭稅者啓罷之旣復命子秀輔  
擢庭試戴花詣闕及公入對新恩亦珥筆登筵觀者

榮之奏事訖仍陳湖中飢荒狀特停沿海逋糴民以大賴是日東萊府使李裕身以倭差平如敏等請開被執規外出來事馳啓 上以守臣義當據例責諭而遽登聞命罷拿而卽席以公代之當日辭陛旣上任戮通事將校之一二奸濫者以肅邊禁遂探得倭情有傳五郎者以倭通事留館久習知我國事情挽留倭差以規利公擇譯人能幹者授方畧行間而撓之且以國有大喪不慰問責其無禮倭差語塞丁丑七月舉帆渡海幕屬請以騎撥馳啓公笑曰是守臣職耳若輩欲以此希賞耶且今沿海頗騷屑馳撥騎

恐惑聽聞乃封啓付一步卒卒病脚路滯啓未徹而嚴教下有巨濟府定配之命數日啓始到 上嘉其舉職卽釋之屢稱曰善處邊事已而特除大司諫暫肅適十月除判決事戊寅正月拜同副承旨 上詢及萊府逐倭事公嫌於自銜畧陳行間之由仍言契人造蔘易致生梗官錢放債害及徵族二弊不待外侮之至將有內潰之憂 上爲之動聽卽命罷蔘契焚債券蔘契因廟議歧未盡罷債券則悉令焚之萊之婦孺歡聲如雷是後屢除承旨大諫輒以病適庚辰 上飭銓曹檢擬而未卽舉十二月因工曹叅議

望以 御筆添書公名以下罷銓官職公以縣道疏  
辭優 批不許辛巳正月上京拜命二月移承旨違  
牌適除綾州牧使八月因事罷歸壬午正月除禮曹  
叅議時有咸興 陵役公以該堂當進間移承旨而  
特仍之二月辭朝三月復命敘勞陞嘉善行都承旨  
受暇下鄉間除副摠管同知義禁五月入謝旋歸除  
工曹叅判以在外適十二月冊 王世孫充奏請副  
使癸未正月帶戶曹叅判如燕當呈咨禮部通官索  
例贈情銀公令諭之曰藩國之奏請冊使大禮也爾  
們預有徵索則討賄也俺等若有贈給則是行賂也

豈不傷事體乎待完請當以禮單爲名而準送耳通  
官斂服七月復命 上詢及銀貨事教曰名正言順  
後遵爲例可也敘勞陞嘉義兼受土田臧獲仍下鄉  
三除大諫皆適十二月除同敦寧陳疏辭乙酉十月  
上受 世孫及諸臣獻爵子秀輔以玉堂賡進 御  
製卽以 宸翰題下曰今見賡韻憶爾父深命以此  
紙送爾父乃手札宣召之意也公聞命感激卽詣京  
將以特進入侍聞有二亞卿缺遂止不赴其恬於進  
取審於避嫌多類此丙戌十月以大司憲承召入謝  
適授同中樞丁亥正月以摠管入衛班 上問年惜

其屈特命陞資憲付知中樞俾於殿庭謝恩旋拜工  
曹判書以焚黃受暇下鄉五月還朝 上召見特授  
刑曹判書時有白頭山望祭之議僉謀既同公獨持  
不可與公同者惟徐相國志修云尋呈辭歸十二月  
上教曰君年望八豈可以鄉爲家公停行叅正朝候  
班而歸三月赴 陵幸入城特除刑判公單心舉職  
獄囚多所平反語人曰刑者非毒人將以補治而弼  
教也凡傷倫悖俗者必繩以重法若老嫗之奸驕良  
女僧尼之留連城市居士之當街斂錢乞丐之成羣  
討索以至襍術妖書之惑人亂俗者博奕浮浪薄父

母棄妻子者輕者刑配重者杖殺都下爲之肅然一  
日 上召郎官詢老嫗刑配事教曰歸語汝判書昔  
先正趙光祖爲都憲男女異路果能痛革此風副予  
望矣九月持平宋憲疏論秋曹事加污蠛之語 上  
答曰秋判謂之執滯則可也今所斥與其人判異是  
傾軋也命適憲職公上書自理持平李淮謂以對章  
反詈又請譴罷 上嚴斥之命刊侍從案公卽拜章  
尋鄉 上賜批曰卿無宦心予已知矣人雖傾軋予  
不捨卿意在禮使許解本職已丑正月上京叅候班  
特命入侍諭曰卿旣來矣以卿爲國之心宜在京也

王深集 卷三十一  
不得已留京邸適有疾秀輔以玉堂陳章請護上  
覽疏命賜藥物蓋異恩也二月特除禮曹判書一日  
四違牌筵臣以病白許適三月還鄉四月秀輔以言  
事被罪諸僚皆配遠地上曰洪某之子宜配橫城  
蓋橫距原厓一舍也五月除知中樞七月移刑判聞  
上候未寧入城九月叅誕辰候班因登對賡進  
御詩翌日徑還十二月親政特除知中樞促令登途  
公陳疏辭賜批曰今歲不來予心悵然命監司傳  
諭又令政院下諭曰卿之尋鄉今幾朔矣昨夜夢卿  
今朝見卿子通禮噫君衰臣亦六旬須卽上來仍除

都憲公疏陳病狀兼暴情地答曰往事今作浮雲其  
何芥滯俟少間卽登途自是臺臣之在外者多因事  
遽改而都憲每命毋論帶職八十餘日未解公強疾  
以水路上京入對乞免上憫其衰許遽命付知中  
樞卽日謝恩以特進入侍教曰待秋涼往受便養  
時秀輔以乞養得平海也公對曰卿宰異於微官不  
欲隨之官矣上曰予已許之獨不諒卿子之心乎  
九月叅誕日候班卽還十月又除都憲聞上候  
未寧馳入城旣平復遽職還鄉辛卯除都憲十月疏  
陳當退者五辭甚懇答曰頃年朴弼琦以下大夫許



耳溪集 卷三十一  
休元景夏年未及而致事觀卿章嘉卿意見卿來當  
許宜躬來受麻壬辰正月 上聞公病甚不得赴召  
特許前請付奉朝賀宣麻於鄉廬仍書下今以手書  
代其臨宣二句並頒賜之公手擎 御書伏枕稽首  
不能加朝衣出戶庭使秀輔具冠服替受焉自是病  
日篤謂子姪曰吾位躋八座年望七旬生老太平更  
何餘憾仍區處家事井井有條并及葬祭之節手錄  
數紙以遺子諄諄戒飭曰惟恐墜家聲罹世網爲吾  
不瞑之憂也疾革前數日拈周易得歸妹之二爻利  
幽人之貞象曰未變常也公怡然曰持正安命吾所

自知而天以幽人之貞命之誠不敢當始病用蓼芪  
有微應終無顯效公遂却藥曰死生命也刀圭何力  
臨簣令婦女暫入訣卽麾出竟以三月十一日考終  
享年六十五訃聞 上驚盡不已親撰文令州官致  
祭是年五月葬于原州衣冠村坐癸之原公容儀頎  
碩器質敦重立心則寬弘而峻正處物則周通而綜  
密至於事親之孝根於天賦每以不記嚴顏爲至痛  
侍大夫人至盛壯猶作嬰兒戲力治農圃躬執釣採  
口體之奉竭誠無缺嘗謂事親者不可不知醫心究  
古方洞曉藥性每值不安節手製湯劑輒收奇效及

其寢疾晝不解帶夜不交睫或嘗糞以驗色味或血指以調茶飲既喪勺水不入口以水道運柩時當秋冬之交閱旬寢處於船中家人憂之而終無恙人謂誠孝所感牲石壙誌手摹古書殫精致誠可謂生死盡禮也事伯仲如嚴君諸姊早歿撫育孤甥人皆感服推以事君一於忠愛知無不言孤立無黨難進易退出處本末著人耳目可按也常語人曰吾素無進取之念視世之鑽刺巧宦者甚於夏畦而高官顯職不求自至可見升沉有定命矣生平與世鑿柄獨受聖知十年之間超至正卿眷待之隆無異山林遺逸

去則敦留來必引接殆當朝公卿之所罕得者人臣遭遇可謂盛矣蓋自壬午後尤無意於仕宦前後召命輒以疾辭而癸未奏請則事關宗國義重往役力疾往還自是屏居鄉廬占別業於鳳溪上月雲亭有水石園林之勝架插圖書樂以忘憂嘗閱辛未年間書筵日記垂淚謂子孫曰猗我先世子姿稟光明正大高出百王發難經史精析義理每以耻爲漢唐中主爲教余每罷講而退喜不自勝豈料今日忽抱此天地罔極之痛也此莫非羣不逞鼓煽碁間積有醞釀之致而如吾者病伏鄉廬未效願一死之誠

况今一種梟獍之類又將不利於春宮思之凜然  
惟恃聖明慈覆保無他慮而吾年迫日吳未及覩  
陰翳快掃太陽重輝將爲不瞑之恨汝輩他日值有  
事則勿惜一死以報國也此可見秉執之確然先見  
之卓爾而公子判書乞休之章所以明其志而趾其  
美也性本儉質一巾一屨十年不易淡然若寒士雖  
不以學問自命而覃思經傳有獨得之見所著有學  
本內外篇理氣往復書及禮記綱目考異文辭瞻敏  
操筆立就識解皆本於六經軌範不畔於八家尤長  
於詩俊逸流麗出入中唐常謂宋人失於言筌明人

病在多華集大成者惟李唐乎有詩文十卷藏于家  
至若書法非所自任而晚好顏太師遒勁有法先世  
碑誌多其手蹟可見才無不周也貞夫人清州韓氏  
西平府院君浚謙之後尙衣直長德師之女無育以  
仲氏同敦寧第五子爲後卽秀輔文科行判書致仕  
奉朝賀側室二男陟輔迪輔二女適李泰萬李尙殷  
秀輔二男仁浩叅判義浩承旨公所居有老栢嘗號  
栢西軒以自况及立朝上每稱其疎野故改號疎  
窩識恩言也概公平生事親則誠禮兩至立朝則  
赤心爲國當事敢言處身則難進易退晚節無瑕可

謂當世之完人而乃若餘事文章亦足以名世俱不可泯而無傳也謹採公議之表著者以告太常氏

戶曹判書趙公諡狀

公諱鼎鎮字士受豐壤之趙以高麗侍中孟爲肇祖入我朝世冠冕至禮曹判書諱珩始大顯諡忠貞號翠屏寔公五世祖也高祖諱相扑縣監贈吏曹判書曾祖諱祺壽直長贈左贊成祖諱遠命判敦寧府事清德雅望爲世完人考諱載德弘文館校理文行見重士類壽不永以公贈吏曹判書妣礪山宋氏禮曹判書諱成明之女以 英宗壬子十一月二十九日

生公沉靜詳順不妄遊戲六歲喪母育于繼妣誠孝深至已巳判敦公歿未葬校理公不勝喪公弱齡重衰見者危之能自奮力學癸酉中生員辛巳筮仕明陵叅奉轉濟用監奉事移義禁府都事奉命入耽羅換童蒙教官陞司饗主簿以僚嫌遞久之甄敘司憲府監察遷平市署令己丑丁繼妣喪旣吉辟爲戶曹正郎屢值敦匠之役費省而事辦堂上甚器重之甲午出監任實縣捐廩刷弊櫛逋實庾民邑以蘇丙申與監司李普行爭事貶罷民鑄崖追思今 上元年擢增廣乙科坐前縣事久未付文職戊戌始除禮

曹正郎叅修 英廟實錄冬拜司諫院正言已亥爲  
京畿都事選入弘文錄拜修撰時 上日開講公每  
陳文義 上亟稱實才秋接慰萊館解館職兼文臣  
宣傳官自是屢拜正言持平校理因嘉禮都監選差  
禮曹正郎用其勞陞宗簿寺正庚子夏差賀使書狀  
官赴燕穿北口詣熱河往來萬餘里賞賚倍常使而  
悉散之從人冬復命拜副校理兼西學教授辛丑三  
入修撰兼禁衛從事官 上親臨瀛館講心經宣法  
醞公與館僚進箋謝三月特擢同副承旨夏從兵曹  
叅知薦爲水原府使尋坐事拿罷未幾敘復入喉院

越例兼司饗院副提調歷戶兵曹叅議壬寅連拜承  
旨陞至左拜司諫院大司諫迭爲諸曹叅議間以承  
旨修進賓筵日記 上獎之曰綜明如此內而鑑別  
外而按釐何試不可特賜銓選筆仍諭大臣曰古例  
才可銓衡則有不經國子而直通者於是選入吏曹  
叅議注擬公平口不道黨目遞拜敦寧都正復拜吏  
議者再兵議者一癸卯拜成均館大司成春夏屢踐  
薇垣春官騎省銓部國子長銀臺轉刑曹叅議值久  
早上應旨疏曰近來風俗不古名分漸淆賤流之辱  
士夫則直施以抑強之政悍僕之背主人則必斷以

工部集卷三十一  
壓良之律品式無別等級不明禮義何由而生紀綱何由而正京司如此外邑可知請嚴飭中外縷縷數百言皆執藝也 上優批嘉之甲辰春夏三入銀臺再入騎省居銓者八時廟議謂輔德爲冑筵講官之首宜簡通政中有文望者公遂膺是選丙午拜副提學自釋褐至此不過八朞外而畿幕者四朔萊館者四朔專對者七朔防禦者六朔內則司喉舌者三十七佐銓衡者三十四宿衛十五師儒之長四宮僚之長三薇垣長二玉署長一刑議四敦都二華誥聯翩首尾相銜殆無一日家居時於是相臣白 上以居

銓最久宜晉嘉善階擢兵曹叅判遞拜漢城右尹尋拜左承旨兼同知義禁府事復拜大司成兼五衛副摠管復移左承旨兼內醫尙衣副提調遞拜兵叅移承旨冬薦拜江華府留守至則民饑賙活不煩于朝改築外城水門疏湮洩鹵以資民藝丁未以吏曹叅判召還臨歸聞島民磨石頌惠以待離營公將騎船命編裨取石沉之甲津賦詩以自嘲後以春秋館事詣史閣髻白盈街持壺酒迎勞戊申春拜左尹移吏叅復行政數月因事承嚴旨判書宋載經拔公銓望上教切責之俾復望後復授公洊違召自劃 上召

耳溪集 卷三十一  
使前慰諭懇至公涕泣力辭 上特從之不竟日再  
除督出公露章乞免悉暴情勢 上爲許一伸移授  
戶叅秋特除大司憲當是時公宗黨太盛爲世指目  
獨自憂嘆已而勢張罪熾羣言沸騰公適當臺地不  
勝公私之痛陳疏自列引隴西士夫之耻旋移亞銓  
遞拜工曹叅判九月出按京畿觀察使人有摘公前  
疏爲言者公露章自引曰識未知幾意非怵禍 上  
命還其疏下教開諭曰未卽先發由於越趨入臺後  
言亦由畏慎此人此舉人孰不怒而何乃吹覓乃爾  
蓋先此春坊舊僚齊發聯討之論而公隱忍未叅至

是而不敢不以義斷之大哉 恩言有若白日之照  
衷情慈父之保赤子也公感激圖報不敢力辭已酉  
內移兵叅尋除承旨又拜大憲時有逆宗自謫上來  
之變公偕三司伏閣陳啓被削黜無何有蕩滌之命  
拜吏叅旋移承旨遞拜大司成庚戌歷都憲工叅兼  
同知經筵移拜吏叅兼冰庫提調因高應觀臺通有  
人言坐削蓋公於復銓望之後或黽勉赴政而至於  
通塞則一切不可否况應觀之出入某家公實不知  
也 上尋燭論者詆誣昭晰無餘敘拜都憲復入吏  
曹未幾超授資憲大夫刑曹判書兼都摠管同知經

王溪集 卷三十一  
筵司譯院奉常寺提調公久居秋官審理重囚都民  
稱其平允辛亥薦拜戶曹判書 上教曰郎官時已  
知其綜明仍特差備局有司堂上兼內醫院 宗廟  
署提調坐事削黜不旬日放敘仍前職兼內資寺典  
醫監提調壬子兼宗簿寺 景慕宮提調還差有司  
之任秋因事罷卽敘仍任戶判還差籌堂復兼 宗  
廟提調是時公病瘁甚當冬至 親享薦俎官非度  
支不可而公不能進 上惜其遞詢替行例有無該  
曹覆奏始勉從之公聞解重務喜動言色竟以是月  
十二日終享年六十一不及晬甲若干日也 上臨

朝愍惜停朝市致吊賻如例曹中吏隸皆失聲號哭  
市人亦爲之齋咨出涕公承乃祖清慎之規一心抑  
畏粵自橫經已受 聖知政注則諒其精白近密則  
嘉其誠恪及至門族傾敗情跡艱危而洞察忱赤曲  
加庇燾公每自公退對諸子曰欲報之德昊天何極  
歷試藩都重寄察其廉潔詳明故畀以財賦委以訐  
謨嘗 教曰前後除職皆出予意予不用卿誰爲卿  
者公感結中心生死向前一疾跨歲實無以強策而  
殫精竭膂不敢言勞金穀經用入不支出而謹塞尾  
閭痛戒關節每日損益之間毋或歸怨於上而沽譽



於下雜物庫世稱判堂私儲而常俸之外一不犯手  
故不假生殖而財用常裕然事煩食少貌日瘦而病  
日革嗚呼其真盡瘁國事者歟公娶韓山李氏大司  
諫萬宗女舉五男長縣監雲綱次雲繪雲繼雲緒雲  
紹一女適應教鄭東觀公孤露成立復振家聲官位  
隆顯子姓蕃衍人以為恭儉謹約之報概其平生持  
身則溫栗如良玉接物則氣韻如冬日立朝居官廉  
辨自礪官尊祿厚不改布素文辭足以需館閣才力  
優於綜事務駐足於熱鬧之場拔身於波盪之中  
主眷不替羣猜自熄可謂朝之吉士國之忱臣也云

何天不假年嚮用方隆而中途隕折凡在同朝無不  
舉笏嗟惜如不佞者托契最深重以姻好步履相先  
後言議相引重而遽然失我強輔後死之慟寧有既  
耶今於易名之狀其何忍執筆而又何敢終辭謹件  
繫其官歷事行要之直而不華以告太常氏

水原府留守贈左贊成趙公諡狀

我 聖上卽阼之十有三年已酉將移奉 顯隆園  
於水原府既卜吉當撤舊邑營新治於以衛 仙寢  
而壯關防臨筵詢曰惟汝文武臣誰可任大事者僉  
議難其人惟簡在 上非前摠戎使趙心泰莫可七

月特授水原府使卽日陛辭馳往相基於府北八達山下野曠水環可容萬戶於是移廨舍建行宮徙吏民千數百家以實之宣上德意務盡人和役夫子來遷者如歸已而因山禮舉百堵俱興庶事咸集上懋其勞進秩嘉義居數年陞都護府爲留守築城建譙防水溉田通商立市增兵建衛屹然爲三輔巨鎮皆公所規畫張設也公字執仲本平壤大姓遠祖貞肅公仁規在麗朝爲名將受封平壤府院君連世以武功顯我朝開國領議政浚爲佐命元勳有弟按廉使胤棄官隱於清溪山改名狷字從犬太祖親

幸其居欲起之終不肯環封其山以旌之遂避入松山誠子孫勿仕後二世至諱又新始官郡守諱溥副提學諱寅當廢朝敦倫不赴舉自號江湖散人除寢郎不就後贈執義生諱廷翼以孝聞復其家及丙子難從廟社入江都城陷配李氏先引決公亦罵賊不屈死朝廷旌李閔贈公職承旨復加吏曹判書諡忠肅寔公高祖也會祖諱猷被俘贖還誓心復讎及孝廟登極命投筆以武進擢至統禦使己亥上賓慟哭嘔血而卒祖諱世發有至性父歿不勝喪配閔氏以公終喪日絕食而盡旌其閔考諱倣以全羅兵

使當戊申之難逆賊維賢以肺腑親據潭陽府倡凶  
言煽惑人心潛輸火藥于賊中詐報以失火狀聞罷  
之賊以破膽而警備得要 英廟獎之曰逆折姦萌  
再造湖南錄原從勲官至統制使居官廉潔家無甌  
石選入清白吏以公貴贈兵曹判書元配鄭氏舉一  
男繼室晉州姜氏柱五之女晉山君希孟後亦舉二  
男公其季也以庚申正月二十五日生夢日入懷與  
貞肅公同祥故小字以應先生而風骨嶷然聲若洪  
鍾統制公曰是吾家千里駒也四歲而統制公卒姜  
夫人教以義方日令就外傳公聰悟異凡一經眼輒

記誦十九始業箕裘雄俊善射而動止凝重諸少年  
皆憚辛巳丁母憂旣闋應勸武內試 英廟見其頎  
然出衆使之前問姓名命調用丁亥正月除南行宣  
傳官承傳帳殿周旋稱旨 上褒異之命設勸武科  
意蓋在公也僚友皆勸以詭獲公正色曰非義取第  
是欺君也聞者咸服明年秋始魁試射直赴殿試登  
乙科例陞六品以訓練主簿歷都摠府都事經歷訓  
鍊副正慶尙左兵虞候癸巳冬以訓練正拜全州營  
將陞通政階甲午夏歷內禁將禁衛千摠乙未出知  
富寧府時北路大饑公與民約曰無糴無以活來春

糴麩無以爲農糧窮者免之捧者必精民畏其威信不一撻而負戴繼集邑有糴剩病民甚公一切蠲罷捐廩以資賑屑松葉耳牟置籠於前民有飢色者公輒調以水先嘗而饋之抄邑中貧無業者貸穀布使作酒餼屏屢沽力自食賑口亦減近歲徐文清莅是邑以善賑有遺愛民以公并稱磨一厓以頌箇滿適當寧三年己亥以曹司五衛將出知龍川府約己裕民一如在富時龍民亦立碑思焉壬寅歸拜堂上宣傳官內乘兼別承傳其冬除別軍職入直禁密癸卯拜昌城防禦使見當峩山城爲要衝必守之地請于

監司加劃餉穀其冬拜忠清水使安興行營在保寧二百里外每歲春秋移駐處在一隅緩急無足恃而反疲於供給非計之得具形便論奏請罷移駐而代置虞侯 上特允之乙巳陞兵使未赴而適丙午拜黃海兵使革不正之糴徵年久之逋威行績成翌年春移會寧府使陞嘉善階未赴而拜北兵使又未赴而辟爲守禦中軍夏拜統制使繕器甲撫卒伍一遵先公遺規而成績尤多捐二千緡贍民庫至今賴之戊申入爲都監中軍旋移龍虎大將兼捕盜大將訓鍊都正尋拜摠戎使己酉七月遷 園議定授水原

耳溪集 卷三十一  
府使移邑治興 園役一委之公使車蜂午文牒電  
急而公往來策應耳聽眼看口呼手判左右酬接而  
條理粲然鑿鑿中窾敦匠諸公皆歎其莫及公殫精  
盡瘁惟恐一事之或差一夫之不便未克體 聖上  
奉先子民之至意數歲之中績庸已著辛亥 車駕  
幸臨先以左承旨內移翌日特拜訓練大將仍令扈  
駕還朝一軍皆聳居元戎歲餘嚴法信令驕兵自戢  
痛革昇平姑息之弊壬子復爲承旨摠戎使未幾移  
御營大將癸丑春水原陞爲留守府議築城十二月  
爲監董堂上初以訓將佩虎符往視明年二月拜留

守兼壯勇外使行宮整理使托以樹根基鞏屏蔽立  
紀律盛民物以拱護我 仙寢始 上諭以大役不  
可欲速期以十年之遠而廟議亦以數百萬財擬其  
費公以爲玩愒歲月勞民糜財竟以丙辰九月告訖  
功凡實役首尾纔二十有五月費不過八十餘萬而  
樓櫓雉堞之壯爲國中之最我東城制舊多疎畧  
上屢飭以一洗其陋無徒爲觀美公仰承 睿旨俯  
按古制務求鞏固堅緻而廣袤崇深皆有尺度佐役  
者或欲致其精巧公曰貴完不貴巧何可費助力而  
延日月乎於是宮室臺榭非不輪奐而未敢加以雕

華 上知公謹慎節約謂筵臣曰漢高用陳平不問金出入今予於趙心泰亦然事雖異信用則一也公聞而感泣乙卯春 上陪 慈宮展禮 園寢還御行宮進壽爵明日推恩宴耆老惠四民仍謁先聖試取文武士于斯時也公以守臣獨當百執事供奉舉行綽綽如流大小從官皆袖手噴舌而歎異之時城役猶未半而南北門屹然先成 上親臨周覽嘉賞之命待事竣豎碑紀實并刻董事人姓名傳示萬年特加公資憲大夫役既畢又賜土田臧獲用紀勲之典也公以水原處三南要衝爲王京右輔而况衛護

園寢非直一關防而已凡係城池兵馬倉廩閭里若夫警守備禦休養教習之要靡不悉心條畫或朔或改指一稟裁輒言聽計從如廣州兩面之割附禿城之改築親軍衛入防軍之選置倉糴之盡作餉穀匠戶市廛之咸集府底皆所質定經紀者而立報警法備協守制遙設間烽以通海偵廣置屯田以裕兵食多造車甲弩矢以備陰雨課民樹藝以業農桑禁民驕侈以敦風俗羣校講兵陣士卒肄擊刺吏習書工習樂皆著節目不可殫記公自己酉受命專管七載規制旣成綱維畢舉內而府庫帑藏米鹽頭屑之微

耳溪集 卷三十一  
外而村閭民產山谿阡陌之廣瞭然無一遺照而令  
行威立藩翰自重至若軍容之盛節制之明殆五營  
三都之所不及以是丙辰春 上閱武于東將臺也  
教曰節度之整嚴豈比於棘門灞上不覺按轡緩驅  
尋常較閱猶施上駟之錫况於新立壁壘有足聳觀  
嘉乃之典容或踰日特賜內廐馬一匹丁巳春又閱  
夜操於西將臺諭以應接若式穀率不差可見將得  
其人之效是秋入爲御營大將兼知義禁尋拜漢城  
府判尹移刑曹判書時有審理覆奏及按治無賴獄  
議讞明晰僚堂退謂人曰長僚聰明人不能及之呼

寫跋辭纒纒如也吾輩文宰只斂手聯署而已自在  
京兆時嘗曰人皆以五日自居也故民訟無已時一  
日在職當盡一日之責豈可以因循彌縫爲能耶到  
手剖決訟無滯案適御將復爲摠使未幾拜壯勇大  
將地愈密而任愈重公夙夜兢懼不敢接應他務而  
惟華城事管轄而終始之 上欲復五衛舊制於外  
營公承命講磨以爲戚氏之法行之旣久不可偏廢  
遂叅互古今撰成軍制圖式裒輯一書以進 上歎  
賞不已顧謂左右曰辭理贍暢雖經術之士蔑以加  
矣於是分屬五邑設官增伍按其法而始行之公已

告病矣已未八月 上幸華城公病甌不能從 上  
臨筵屢歎公亦泫然自悼竟以九月二十七日終于  
正寢享年六十公始病 上日問之藥物載途訃聞  
上震悼曰此將臣受知也深故委任也專自關西防  
禦北閩南服袞袞超越數歲中遂至登壇而顧彼營  
洛之役前後殫誠績庸茂著雖汗馬提兵之勞罕與  
爲比屹如干城倚以爲重司三軍之命躋八座之秩  
未足以酬其伐而旌其功豈意大樹之飄零曾不少  
淹乃爾嗟盡之極不覺哽咽成服日致祭令該曹加  
秩贈職照盟府上勲之例節惠亦卽舉行例賻外倍

數輸送柩材亦擇給於是贈崇政大夫議政府左贊  
成其致祭文許以升平良將麒麟第一又若曰天寔  
生卿作予干城通才宏畧脩幹偉容又曰謹守矩矱  
寔仗忠赤汾陽謹身征虜憂國又曰殫竭心膂積瘁  
嬰痾如獲痊可剪鬚奚惜此豈從古人臣所得於君  
父者哉斯可見際遇之隆殊絕千古也竊覲公身長  
八尺方面美鬚髯嵬然若嶽峙而神采燁如動人性  
莊重矜默未嘗有疾言遽色接人恭而有禮折節下  
士無矜驕色蓋其天姿純篤自近於學而不待矯飾  
也孝友根天嘗以不識嚴顏爲至痛又早背慈訓雖



位至貴顯無樂乎鍾鼎嘗謂子姪曰今吾所當盡心者惟祀饗而已每當忌日躬自視饌滌器或在官次必爲位而哭如孺子慕事仲兄如父每朝問寢不衣冠不見叔兄素嬰疾公養在同室如保嬰兒飲食服御無不稱其志而極其歡其內行之懿如此家世清寒素無產業周流州閩不屑財利其初登第也佐筭營幕月餘而歸主將饋以錢八百貫其意知公無庇身屋也公不辭而出自明日辦宴游具携賓僚置酒張樂劇游樓臺江山之間八日而盡或勸止之公笑曰我此來豈爲買屋錢哉無此幾乎負好江山一營

人莫不灑然變色主將聞之曰真登壇客也此雖少時事而亦可見器量不凡矣及其致位隆赫俸祿甚厚而施窮恤孤如不及貧儒寒族倚以爲歸視其室僮僕或不繼廩常以榮寵踰分世路多險謙謙自持身處肘腋手握重兵榮戟列戶桃李盈門而未嘗爲身家營一事爲子姪求一官入侍前陛 天語溫諄而屢起屢伏戰戰如不能容此所以屢承謹慎之褒而恩遇不替於始終也自少聰明過人識慮深遠讀兵之餘嫻習國家典章關防形勝山川道里軍額兵制以至錢穀器械律書農政之類靡不森羅胷裏物

耳溪集 卷三十一  
來則應故城華之日卒得試用而至若城制車式與夫引重諸器人多未諳而一皆領悟立即奉行其爲承旨也 上見公奏對博雅嘉之曰古稱儒將卿近之矣每有頒書與閣臣等素喜作字暇日臨池爲戲適健濃麗尤長於大字行宮門楣扁額多承命書進焉早結 明主之知感激殊遇常有委身裹革之志適會 園邑有事受任於制作草創之際盡節於桴鼓版鋪之間晝則身先櫛沐勞工董事夜則指授賓佐考課勤慢殫精竭思不遑寢食而手對密諭呼吸上通至於贊襄彌綸之績人莫能知者疾篤前數日

使人把筆口呼華城事宜十數條皆宿所揣摩欲以敷奏而未遂者也方其喘喘垂危而神思灌注條序無錯其眷眷向國之誠如此既自知病無可爲不肯進藥而及內下珍劑輒扶起擎奉感激摩挲曰速煎來 君父之賜也臨絕垂淚太息曰六月以後更未承 天顏是吾恨也一言不及私少無怛化之色貞夫人竹山安氏兵使允福之女端莊靜一親戚咸頌隨公在華城也恩賞屢及 慈駕幸臨又特賜緞帛夫人怵惕不安未嘗向人誇耀及公寢疾半年根委漸痼夫人只願先死以續公壽及秋濱危潛自絕粒

旬有餘日一夜昏臥家人候之則已絕矣床有鹵汁  
痕嗚呼烈矣古有下從而殉者身先代之未之聞也  
趙氏之先以烈旌閭者再可謂趾美齊光而亦可見  
公刑家之化矣始葬于水原魚灘里越十日公歿將  
以禮月同穴而祔舉二男三女男及一女俱夭二女  
長適前宣傳官柳暉次適士人李伊 取族兄性泰  
子岐子之前三陟營將岐與柳暉男女皆幼良浩嘗  
受海西節閩公名辟爲幕府會除京官未果偕丁酉  
左官北塞公時爲富寧相距百餘里往來頻繁懽然  
相得聽其談論觀其政治規模弘大才識通鍊竊期

以屬大事當一面曾未幾何受知 聖主超陞戎壇  
及至華城奏功無減於帶礪樹勲兔置之詩曰公侯  
干城又曰公侯腹心蓋言外內皆托重也如公可以  
當之 聖主之注意方隆朝野之屬望甚重而膺力  
未愆胡奪之速三軍悲號搢紳悼惜咸稱失我良將  
至若隱卒之諭曠絕前牒光垂百世矣夫何加焉公  
之從姪前水使岱列公事行來徵易名之狀謹最其  
世德家行與夫宣力四方之績遭遇 聖明之盛爲  
國竭誠之節以告于太常氏

耳溪集卷三十七終

耳溪集卷三十八目

諡狀

高麗按廉使梧隱金公諡狀

工曹判書柳公諡狀

贈兵曹判書鄭公諡狀

贈吏曹判書漆坪君尹公諡狀

召募使贈吏曹判書李公諡狀

叅奉贈吏曹判書李公諡狀

弼善贈都承旨鄭公諡狀

豐寧君洪公諡狀

耳溪集卷三十八

諡狀

高麗按廉使梧隱金公諡狀

梧隱金公士廉新羅宗姓也自敬順王遜國入麗子  
 孫大昌十一代孫敏成翰林追封尚書僕射生諱孝  
 印兵部尚書贈三重大匡修文殿大學士生諱方慶  
 三重大匡僉議中贊上洛郡開國公諡忠烈出入將  
 相有大勲勞配享麻田崇義殿卽公高祖也會祖諱  
 恂判三司事上洛侯諡文英祖諱永煦藝文館大提  
 學三重大匡左政丞諡貞簡考諱葳副知密直司事

三世襲封上洛勲業赫然輝映東史公以奕葉世胄  
早歲登科官止按廉使名望節行冠冕朝紳而值麗  
季政亂不得展其蘊與牧隱圃隱冶隱三先生志同  
誼合屢陳讜言及辛晫用事以書斥之歎曰晫非正  
人後必亂政言竟不用而麗運訖於是冶隱見幾而  
作圃隱以身殉國牧隱不屈而終公則隱於清州之  
北陶山之中閉戶不接人不面漢陽而坐我 太祖  
聞而義之徵以左司諫不就賦詩而見志臨歿謂諸  
子曰我麗朝舊臣世爲卿相而不能匡時扶顛又不  
能與國偕亡是天下之罪人也我死葬之深山勿封

土勿豎石毋使人指點爲某塚汝曹出身于麗新朝  
不可仕也及歿子孫遵遺命葬于梧根陶山而夷其  
塋不封樹屢經兵燹遂失兆域逮 肅廟四年塚圯  
而誌見後孫始築土而封之焉嗚呼士當鼎革之際  
避世韜光終身全節者古亦有之而至若隱其丘隴  
使人不知葬處者其苦節精忠可與孤竹齊光也公  
之子若孫亦皆曰吾父與祖之墓旣不封矣吾輩何  
敢爲堂斧乎三世皆平其塚可謂是祖是孫矣後之  
試士者慕其風節至以遺命平塚揭題土人至今傳  
說歲戊子州人建祠于州西松泉地越三年辛卯湖

西多士陳疏請額下該曹稟處會朝廷多事未果公議至今恨之故松泉拋樑之辭有曰心存晉朝常慕五柳之節耻食周粟早聞孤竹之風斯可見高風峻節卓乎難攀矣不佞嘗讀麗史竊嘆其三綱不正異教恣行立國規模誠不免後人之議而獨於亡國之後忠臣烈士鬱然並興殆前代之所未及者何也蓋嘗思之三韓之初羅濟之間疆域分裂干戈相尋老羸疲轉餉丁壯罹鋒鏑以至千餘年之久惟時麗太祖革弓氏之亂救萬民之命混一三國易暴以寬釋甲治農黎民安樂休養生息汔五百年國富兵強家

給人足利澤之入人甚厚故胡元肆喝強臣擅國而民心不畔屢躡屢起及至 聖人受命市不易肆三監之亂不興庶頑之誥不作從古革除之正未有如此之盛者而惟其遺臣義士抗節不仕者指不勝撻如圃冶牧三賢尙矣其餘趙松山狷元耘谷天錫鄭雪壑矩李清華陽昭相携而歸遜跡不悔矢心自靖余於是益見麗祖之功德百世不可諉也至如金按廉之不封墳塋又諸公之所無也何其烈哉惟我朝崇獎節義尤惓惓於勝國遺忠無幽不揚多有建祠而易名者獨於金公未蒙節惠之恩實爲清朝之缺

耳溪集 卷三十八  
典茲因士林之倡後孫之請謹敘其大節以俟太常氏之採焉

工曹判書柳公諡狀

公諱辰全字叔春自號竹堂東方之柳皆出於文化以高麗大丞車達爲肇祖而其後有諱彥琛以功封晉州遂爲晉州人世有名卿聞人有諱珣事恭愍王當革國讓勲以門下贊成退而漁釣有子寶文閣直提學諱謙仕本朝生北部令贈承旨諱悅部令生司藝贈叅判諱子文司藝生進士贈叅贊諱漢平三世皆以公貴也叅贊娶南陽望族節度使洪貴海之女

以弘治丁巳生公公生而雄毅豪邁及長力學中壬午司馬兩試所與遊皆當世知名士辛卯登式年科初補承文院正字薦入史館授藝文檢閱序陞待教移承政院注書丁酉例陞司憲府監察拜兵曹佐郎移侍講院司書戊戌拜司諫院正言屢歷司憲府持平侍講院文學選入弘文館爲校理橫經啓沃有古講官風辛丑陞應教與副提學李公彥迪直提學李公浚慶校理權公轍李公滉等上一綱九目疏上亟稱善旋拜掌令執義尋移典翰陞直提學而常帶槐院春秋之銜蓋寫咨文修史職非公莫可也癸卯



耳溪集 卷三十一  
特授副提學自經已卯之禍士氣摧沮至以小學爲  
諱人莫敢言公慨然率館僚上疏曰已卯之士以迂  
遠狂狷之質有好古尙志之心又信 殿下好善之  
誠謂三代至治可以指日倡小學之教不能無紛擾  
促迫之弊萋斐一織打盡士林并與其書而詆毀之  
如宋朝僞學之禁將雖覆軍其可疑兵書之難行醫  
雖殺人其可謂古方之難用乎 上優批開納仍教  
曰小學教人之本豈可以已卯人而廢小學乎近來  
人心士習大不如古上下莫不憂歎此疏之言大關  
治體予當留念焉學禁遂解李文純稱以一陽疏再

長諫院甲辰入承政院爲同副承旨陞右承旨秋以  
賀聖節使如京師還又長玉堂丙午復爲左承旨陞  
都承旨丁未 中宗大王祔太廟以勞加嘉善未幾  
擢大司憲戊申兼同知春秋館事冬遷工曹叅判己  
酉觀察全羅道庚戌遞拜同知中樞又以聖節使朝  
京辛亥出按京畿癸丑拜吏曹叅判兼都摠府副摠  
管秋出爲平安道節度使甲寅罷還是時經筵進講  
周易命選儒臣明於易學者 上聞公名卽命以西  
職登講席乙卯拜漢城府左尹時島夷寇陷達梁等  
城 上儲將才廷望屬于李左相浚慶及公特加資

憲階知樞府復命巡察京畿彈壓根本之地公繕完  
守備勵養士馬威惠並行自是常令叅聽南北邊務  
丙辰判漢城尹秋拜咸鏡道觀察使委以北門鎖鑰  
治績茂著秩滿拜工曹判書已未兼都摠府都摠管  
庚申春患風眩辛酉三月十一日竟不起 上不視  
朝賻贈有加五月十一日葬于高陽郡德陽縣陶井  
先塋之側公篤於孝友善居喪事兄如嚴父事嫂如  
慈母奉先以誠睦於宗族家法甚嚴閨門之內肅如  
也律已儉約屢典藩閫居第朴素性不喜崖異之行  
而至於君德時政之大者未嘗不積誠獻替時有妖

巫熒惑人不敢言公於經筵奏曰昔 世宗嘗寢疾  
中使奉 慈命率妖巫禱于成均館儒生等驅逐之  
世宗扶疾起曰士者元氣元氣不衰予疾其愈養士  
氣闢左道卽 殿下家法也 上嘉獎之同朝爲之  
聳聞爲學不專章句務明大義不喜吟咏而詩格清  
勁筆法有古意兼工畫竹傍治孫吳書射必命中當  
時稱文武吉甫咸屬望以元帥其在北關專心戎政  
而首刊小學等書以爲敦化之本蓋自己卯後國中  
小學板本皆毀賴公重刊而遂大行焉其按京畿有  
搜訪遺逸之命時成聽松守琛趙龍門昱以尊信靜

菴之人遜世不求知公特舉二公以應之士論翕然  
重之公初娶別提金興門之女後娶判決事尹衡之  
女金夫人生三男一女長曰濤文科承旨次日溶武  
科府使季曰淮縣監女適承旨鄭惕尹夫人生一女  
適士人安騰側室有三女孫曾益蕃昌最其顯者曰  
縣監瑋贈領相忠景公珩皇明摠兵忠壯公琳孫也  
翊衛忠傑晉陽君孝傑說書之芳叅判之發義士贈  
佐郎智傑曾孫也縣監煥然奉事燦然判義禁武愍  
公懾然兵使坦然同義禁斐然府使浩然牧使卓然  
都正忠毅公炳然玄孫也贈承旨星瑞統制使星彩

星樞兵使星漢晉城君星三府使星明縣監星五水  
使星老星一府使星緯星昌經歷星河叅奉星徵司  
評星東五世孫也僉知日章贈兵判就章水使貞章  
叅議憲章正郎得章府使鵬章兵使純章右尹顯章  
水使經章六世孫也奉事宗基水使聖基惠基正郎  
億基府使善基彙詰同知鼎周前承旨甲基前府使  
協基前叅議憲周七世孫也府使鎮斗鎮台鎮普鎮  
豐北兵使鎮夏水使鎮說前都摠管鎮恒都正鎮榮  
前府使鎮淑鎮茂鎮懾八世孫也府使達源前水使  
心源前校理河源今都正孝源前府使大源晦源弘

源今正和源副正命源九世孫也前府使相燁相亮副正相斗十世孫也噫其盛矣傳曰積厚而流長根深而實蕃者詎不信歟曩歲良浩備官太史掌修中廟寶鑑抽金匱閱秘史獲見公癸卯副學時一疏不覺歛衽莊讀竊以謂扶國脉於將絕張士氣於旣摧百世之下想其風采因謹載疏本於編中今上丙辰用大臣言公孫忠景忠莊武愍忠毅一時賜諡下教若曰柳氏之門何多忠臣名將也與李忠武舜臣李貞翼浣伯仲家聲前史罕聞因舉一門六忠而褒嘉之公之後孫相與謀曰今此四忠旣舉節惠之

典而惟公法當得諡漢陰李公撰其狀值昏朝寢不行年代遠狀文逸不傳遂至今未請於朝廷今幸遭遇聖朝褒忠獎節之時公之諸孫並蒙恩典而獨未及於公者其敢曰有後乎姑遲延諡之禮而齋洪忍齋所撰碑文及遺事數條來請狀於不佞不佞邈然後生也何敢與議於狀德之文而顧於平昔慕公名論實有執鞭之願今何敢辭又見公手書忠孝傳家清白遺業八字爲貽孫之訓觀其後孫文蔭武立朝者百數十人皆能謹守先規先輩稱柳氏之家大率行過於言質多於文其言信而有徵矣噫公之生

在於丁巳而今於四回丁巳之歲始請易名之狀殆若有待歟謹撰次如右而告太常氏

贈兵曹判書鄭公諡狀

公諱世雅字和叔延日縣人也延日之鄭皆祖於高麗直臣樞密知奏事襲明世有名卿至版圖判書林有二子長曰仁壽三世而生圃隱先生夢周道學節義為東方儒宗次曰仁彥四世而生烏川先生從韶以成三問同年友歷臺省銓郎丙子獄起引疾不樂仕有高世之名於公為高祖也考允良遊退溪先生之門以儒行薦授齋郎不就妣永陽崔氏奉事德嶽

女也公以嘉靖乙未生性端重有法度篤志力學弱冠舉進士嘗詣京師草疏請斬妖僧普雨士論躱之善事親能養志鄉里稱其孝親歿隱居紫陽山中讀書訓子弟萬曆壬辰倭人大舉入寇列郡崩潰車駕西狩公慷慨流涕曰國有難當死耳寧可竄草間求活耶遂驅諸子編行伍草檄募鄉兵旬月衆至九百人推公為帥當是時郭公再祐起玄風權公應銖起新寧相與為聲援賊潛師過新寧公與權將軍逆擊大破於朴淵上軍聲始振節度使朴晉忌義兵功出已上往往沮撓之公上書招諭使金公誠一陳其

狀請受節制金公大喜署公爲義兵將已而賊據永川爲久屯計放兵四劫七月公約權將軍合兵進圍賊嬰城死守公鼓諸軍肉薄登城賊走入官倉我兵乘風縱火賊大潰城外伏兵起盡殲之八月擊慈仁賊破之進攻慶州賊朴晉亦悉兵來會公當先鋒力戰賊出北門掩後朴晉兵先潰賊圍公急馬逸公子宜藩讓馬乘公救公出與壯士十餘人皆死之公收散卒發震天雷擊賊賊大挫棄城走西生浦於是慶山軍威諸賊聞風駭散退屯江右由是江左獲全朴晉匿其敗上功受賞公不與焉或以爲言公曰吾聞

君子正誼衆人徇名吾知報國而已功非吾志也人比之大樹將軍公本儒者平居恂恂謙退及臨陳見賊輒奮身鼓勇爲士卒先故得人死力所向皆捷然至於計首級論功卽讓與諸將故勲賞獨不及公人以是益高之居無何天兵東下復三京公卽以兵屬曹希益歸臥紫陽舊居自號江湖叟題詩以見志李公元翼體察嶺南躬往訪之薦于朝屢徵不起及授黃山察訪數月棄歸吏卒立碑頌之自是杜門不復出與張旅軒顯光曹芝山好益李蒼石坡往來講道義以壬子閏十月三日卒葬于郡北騎龍山旅軒先

生以文哭之曰公在鄉閭薄夫有耻懦夫思作爲善者有所恃而不沮爲惡者有所憚而不恣至若壬辰之事有非人人所及者夫人孫氏縣監致雲之女也舉四男長生員宜藩卽死於陣者次汝頌早夭安藩守藩皆武科宜藩無子子守藩子好禮官縣監安藩二男好仁好問守藩三男好義好禮好信惟好仁以文顯官牧使後孫仍居永川今數百人爲嶺外盛族始宜藩死鶴峰金公聞而嘆曰此非二百年培養之力耶卽馳驛聞贈尸曹郎賊退求尸不得士大夫爲詩吊之公以其詩招魂而葬名之曰詩塚公旣歿嶺

外多士列公節行請建祠事下禮曹不報 英宗壬子五代孫重器以承文正字上言特贈資憲大夫兵曹判書兼知義禁府事今 上八年甲辰八世孫來休又伏輦道請所以易名者 上可之來休以良浩曾爲禮官詳公本末賈遺事來請狀公以圃隱之門孫得烏川之緒業居而傳家學出而殉國難讓功不居超然長往義甚高不可以一節名觀乎旅軒之誅先德行而後事功斯可以知其人焉謹撮諸賢所爲誌狀及豐原趙相國碑記而敘次之用告太常氏

贈吏曹判書漆坪君尹公諡狀

王澤集 卷三十八  
昔我 宣廟二十五年壬辰倭奴大舉入寇旬日薄  
漢京 車駕避鋒西下次義州諸路瓦解命令不通  
于時咸鏡監司尹卓然遣其子前佐郎慶元草行二  
千里奔問于行在會畿伯與陽城縣監缺朝廷將選  
忠勇有文武才者往代之於是僉推沈公岱爲畿伯  
尹公慶元拜陽城沈公舉公及姜公壽男梁公誌爲  
從事官將馳駟赴任公與諸公慷慨揮涕執手語曰  
成敗天也當以死報公以鹿皮纏股姜公取紅絲綰  
髻梁公頭着白緣網巾所以識屍也行收兵進至漣  
川界時賊充斥畿甸王師單弱而公與諸公激以忠

義人皆効死遇賊於澄波渡屢戰破之賊少挫乃移  
屯朔寧依山樹砦爲據險戰守計京城民間官兵在  
近聯名投狀來報賊情自願內應者踵相接沈公大  
喜謂京城不日當復有輕賊意機事頗不密公憂之  
屢諫而未之信遣人城中約日夾擊賊訶知之殺斥  
堠將潛師夜襲四面合圍我軍大亂潰不可支沈公  
據杏樹不動先被刃公與姜公梁公植立亂鋒中彎  
弓擲矢連殪賊數十創血滿體格鬪愈益奮同死於  
杏樹下卽壬辰十月十八日也澄波之役公所斬殺  
賊尤多賊深恚之衆刃交斫被害最酷云方公之扈



駕在龍灣也觀察公自北關貽書曰國賊未討國耻未雪藩多賀蘭幕無諸葛世受國恩報以何物只有一死矢不苟活吾衣有贊汝背當涅聞者莫不流涕及是公果死於國可謂不負父訓矣賊退陽城座首李文白泣諭衆購求公屍殯于山谷間聞公夫人在廣州齋糧往護之亦見公信義之感人如此亂定後特贈公左承旨錄原從勲 英廟壬戌加贈大司憲漆坪君命旌其閭公字善餘籍漆原始祖新羅太師始榮高祖直提學碩輔選廉謹吏以直言忤燕山主卒於謫 中廟改玉贈吏曹叅判曾祖內瞻寺判官

文亨贈吏曹叅判祖牛峰縣令伊贈純忠補祚功臣議政府領議政考觀察公官止戶曹判書錄光國勲封漆溪君諡憲敏母礪山宋氏同知孟璟之女公以嘉靖庚申生壬午進士戊子筮仕經義禁府都事冰庫別提歷戶曹佐郎漢城庶尹止陽城縣監公氣度異凡才識夙悟在金吾當己丑大獄每奏事 上稱其敏達幼失所恃奉繼母無違志及至殉節繼母悼傷如已出難平返葬廣州大院洞先塋坐庚之原公娶光山鄭氏同知演女生四男三女長啓基漢城判官次東基宣教郎次培基孝基女適直長朴安立士

王溪集 卷三十八  
人沈闢監司李培元朔寧人卽公立懂之地構小屋以戰亡日並享諸公郡之多士屢聞于朝請建祠賜額而沆未諧焉今 上辛亥本郡守適登筵提奏特命道臣建祠並享四公仍賜額曰表節遣近臣致祭後因監司徐鼎修陳達又命賜諡嗚呼壬辰之難敵王愾死國事者舉蒙褒揚之典而惟公因子孫之零替至今泯翳公議久而嗟惜幸值我 聖主臨御崇獎節義無幽不闡今於二百年之後如是表章旣錫之華額又侈以嘉諡豈惟一邦之人無不激感將以勸後之爲人臣者豈不懿哉謹撰次死事始末以備

太常氏之採焉

召募使贈吏曹判書李公諡狀

公姓李氏諱廷鸞字文父全義人也麗初有諱棹佐太祖位太師實爲鼻祖自是世有冠冕七百餘載有諱昌壽官禮曹正郎卽公之曾祖也始家全州祖諱效忠官兵曹佐郎贈承政院都承旨靜菴趙先生深重其爲人考諱承孝官弘文館修撰賜暇湖堂與用事者有嫌退居田園退溪李先生題詩其居惜其枳屈妣修撰金應璧之女以嘉靖己丑生公骨相魁偉及長慷慨有大志懷奇氣不欲齷齪隨人後湖中士

耳溪集 卷三十八  
大夫咸以爲不及焉十五歲丁母憂廬墓三年盡其禮制與逆賊鄭汝立同一城嫉其凶悖常以莽卓目之戊辰公登第賊顯重於朝擠公不用壬申丁父憂廬墓哀毀一如前喪服闋補承文正字轉博士戊寅陞典籍除海美縣監庚辰罷歸除良才察訪賊猶媒孽不久而罷常低回冗散困躓百端者十餘年而少挫焉及賊反誅重峰趙先生服公先見之明庚寅拜開城都事有扳援宮掖者怙勢恣橫公縛致重杖之其不畏權勢類此壬辰倭奴大舉入寇自嶺至湖屯錦山以撼全州會府尹新死一境惴惴無朝夕計

時公罷官家食糾聚義旅將西赴行在按使驛聞于朝止公行留攝州事委以保障公慨然曰今賊鋒遍七路獨湖南僅通國脉若失此州則湖南不能保而國事無可爲我王臣當與此城同存亡遂先驅家累入城士民咸從令不敢動公治守禦具晝夜在軍中數月不解決拾臂肉皆爛日厲氣巡城過家門未嘗一入語及君父播越必西望痛哭嘗啓足示子弟曰足底黑子汝等宜知之蓋有志於原隰之哀也及賊薄城下公輒去所乘馬使人諭家眷曰卽不幸宜各自決無污賊手不則無以見我於地下遂誓于衆

直隸集 卷三十八  
曰各守爾部毋枉費一矢敢違者斬城中肅然賊知有備宵遁事聞褒授奉常寺僉正癸巳 大駕還京陞軍器寺正轉拜水原府使時新經兵燹民不料生公自奉薄而賦役輕一邑晏然丁酉秋倭悉衆再舉公爲全州守城副將措置規畫一如壬辰時州民恃而無恐及天將棄城而逃城中大亂公怏怏無奈何單騎馳訴於朝言淚俱下廷臣莫不感動遂以公爲全州府尹兼三道召募使公至州賊退纔數日公不解衣撫摩瘡痍民皆全活麻提督南下饋餉不給方伯與接使皆欲刈取在野之禾公不可曰是塞民還

集之路我當措備遂勸諭人民各出米穀以供軍食已而解符閒居庚子疾病召宗族訣曰某日吾其死矣國恩未報是吾恨也指授後事不許婦人入見遂卒享年七十二葬州南長坡洞公孝友出天追遠之誠老而益篤遇忌日則白笠素衣不進杯酌哭泣哀慕如居喪時友愛諸弟家法穆如朝廷居官以冰蘖自守好善如嗜欲惡不善雖貴顯者若將浼焉概公平生始當鄭賊之盜名欺世也居比隣顯言斥絕以此困躓而不少悔及遭板蕩之時提孤軍守全城以却方張之賊終贊復國之烈傑然爲中興名臣夫人

耳溪集 卷三十八  
李氏宗簿寺正仁賢之女生二男二女男曰遵吉先  
公歿導吉察訪女適生員洪宇慶正字閔汝儉遵吉  
生三男長男榮先逸叅奉贈領議政監役尙贊右議  
政諡忠貞尙真庶尹尙隣曾孫也監役延宗縣監延  
世佐郎延大主簿延會郡守延普承旨延德玄孫也  
郡守宇春獻納宇夏正郎宇濟五代孫也逸叅奉晉  
聖直長觀聖縣監協聖六代孫也縣監揆文縣監鎮  
熙七代孫也監役容萬武縣監元萬八代孫也後承  
蕃昌代出聞人或至大官可見積德之報如執左契  
矣公以曾孫右議政尙真貴贈吏曹判書兼兩館大

提學今 上某年兩道多士上言公仗義樹績事請  
賜諡命監司採輿論考文蹟上于禮曹禮曹覆啓命  
議大臣諸臣僉議皆同 上允之其後孫洪萬持月  
沙李文忠公暨尤菴宋文正公所撰碑表來乞易名  
之狀良浩敬受而讀之碑則盛稱守城之功實基中  
興之業表則闡發辨奸之明先於趙文烈忘身殉國  
之志未嘗不同嗚呼偉矣又嘗見芝峰李公所記云  
國朝實錄在內外史庫者蕩盡於壬辰而惟在全州  
者賴公獲全其功永垂百世之惇史爲之擊節歎慕  
謹最其大節表著照人耳目者以告太常氏

耳溪集 卷三十八  
叅奉贈吏曹判書李公諡狀

壬辰之難三京失守 車駕播越國之不亡實倚皇朝之力而七年干戈生靈魚肉人心終不離貳克成中興之烈者式有賴於倡義殉國之士當時義兵四起成敗不同而惟錦山之戰最偉七百義士駢首爭死賊之精銳大挫兩湖因此獲全蔽遮江淮之功無遜於唐之睢陽至今照耀人耳目倡義之首卽趙公憲李公光輪也趙公旣贈大官加以美諡而獨李公贈止憲職未及易名識者恨之幸值 聖明光御首褒節義之士以樹風聲於是湖右多士抗章齊請特

命賜公諡加贈正卿俾與趙文烈匹美齊光猗歟休哉李公字仲任本驪州人大顯於麗朝六代祖行以大提學遯跡不仕自號騎牛子文章節義與圃牧兩先生并稱我朝賜諡文節子逃仕本朝官藝文提學至諱師瑗丁燕山朝無意仕宦避居洪州卽公王考也考諱遇隱不官以壽秩僉樞娶潭陽田氏監察秀女以嘉靖丙午生公文學行誼爲世所推與趙重峰吳楸灘爲知己友 宣廟己卯中生員以孝行薦授文昭殿叅奉公辭不膺以經史自娛壬辰倭奴大舉入寇乘輿西狩諸路兵皆奔潰公慨然揮涕拜辭僉

王溪集 卷三十八  
樞公曰家世以忠孝相傳主辱臣死此其時也有弟  
有子可以養親小子欲赴國難僉樞公曰吾今老矣  
無以効力汝能爲忠臣使我爲忠臣父孝莫大矣汝  
其勉之公遂募聚姻親暨村丁家僮壯健者三百人  
斥家資備戎裝用色絲縫衣服謂家人曰用此爲識  
尋我骨於原隰之哀公弟光輻子大濬泣請從公揮  
之曰我則誓心殉國汝曹留侍大人也遂仗劍起初  
欲西向勤王聞賊多據清州窺湖右將引兵勦滅時  
重峰趙公倡義於沃川爲道臣所沮士卒多散趙公  
勢孤力弱轉至湖西蓋公會與趙公預知島夷之變

約以同死國事至是趙公見公舉義甚喜與之合勢  
偕往清州會僧將靈圭領兵至進薄城西躬冒矢丸  
奮義力戰士無不致死賊大衄退謂曰義將行師非  
官兵比冒死直前其鋒不可當遂焚屍潛遁公與重  
峰靈圭連兵向錦山賊之據錦者最兇悍其衆數萬  
皆言衆寡不敵宜按兵相勢不可遽嬰其鋒公與重  
峰仰天誓曰 君父安在敢顧利鈍耶遂直搗其陣  
灑血賈勇用一當百所擊殺無數賊三北而我軍矢  
與力俱盡日且暮兩軍不相見將士無人色而公意  
氣自若督戰益急張空拳奮擊遂死於賊鋒三百義

旅無一旋踵同日殉節時八月十八日也凶問至家子大濬冒賊陣直往戰地公死已多日而顏色凜凜如生不待衣縫而可辨但失其右臂矣遂負屍歸葬於洪州化城先塋之下公得年纔四十七亂定朝廷褒贈司憲府執義旌其閭錦山之人立祠名曰從容堂與趙重峰高霽峰同享焉嗚呼人臣之殉國難或職守封疆或受命討賊力竭而死是謂殺身成仁若公者名登一命未霑微祿身居畎畝所謂不識何狀而奮不顧身倡起義旅率數百鋤耰白梃之徒抗大萬毒丸利劍之賊血膏原野視死如歸豈不烈乎偉

哉可與趙重峰高霽峰并輝竹帛而至如趙公則又是知心之契早以道學節義講磨砥礪至有爲國一死之約則素所蓄積可知已若其行本於孝弟志恬於名利倉卒起事得人死力以少敵衆有進無退天不助順全師敗沒而賊死亦過當遂與茂朱諸屯相率撤去其功亦不可掩矣以故殉義碑稱其最著卽叅奉李某慷慨有節槩實贊終始云者可見一代之公議矣賙贈之典雖下於當時而節惠之章有待於今日士林之感激興聳當如何哉公配晉州姜氏郡守晟女舉三男四女男長大濬生員縣監有忠孝家



耳溪集 卷三十八  
風清陰金文正公撰其墓碣次大淳蔭縣監以孝復其家次大淑進士正郎女長適郡守李惟義次牧使宋興周次李惟康次縣監權益慶都元帥慄子大濬三男三女男長以省生員郡守昏朝時在太學與鄭公澤雷聯疏扶倫次以養無嗣次以存魁文科歷踐玉署銓郎政府舍人以文學著名而早卒官不長女長適郡守閔震慶次府使柳景紹次縣監李廣大淳有庶子以策大淑一男以馨進士都事以省娶文忠公金尙容女無育取以存長子萬徵爲後蔭廣興守四女長適郡守尹弼殷次進士金鉞次教官崔後遠

次郡守李行運以存次子萬徽進士洗馬庶子萬衍武科萬衛萬從以策有一子萬齡以馨二男三女男長萬夏贈戶叅次萬長進士女長適李灌次叅奉金斗燦次朴鈇玄孫以下不盡錄噫公之歿今已二百餘年矣死事始末載於寶鑑及再造藩邦誌抗義新編殉義碑等書而若其居家言行經亂失傳世遠無徵公之六代孫承旨秉喆採輯遺事來請易名之狀良浩平日慕公節義卓然義不敢辭謹敘次國乘外史之昭著者以告太常氏

侍講院弼善贈都承旨鄭公諡狀

公諱百亨字德後姓鄭氏本晉州人以高麗僉知中樞府事莊爲肇祖逮我太宗朝有修文殿太學士恭戴公陟以文衡叅修五禮儀錄清白吏有子誠謹事成廟爲左承旨及燕山甲子被士禍以忠孝旌門賸享于廣州龜巖書院事載名臣錄是公高祖也曾祖諱舟臣承文博士痛父非命六日不食號泣掘地齒脫而指落致自隕朝廷旌其門亦入名臣錄祖諱元麟以蔭官叅奉考諱孝成以清士著名以蔭官忠清道觀察使兩世皆以孝旌門妣貞夫人南陽洪氏郡守義弼之女公愛親有至性自髫齡得新味未

嘗先入口而進於父母及長日必冠帶不離親側有疾則沐浴焚香祝天願以身代與兄弟食同床寢共被閨門之內和氣融如推以及於親戚朋友敦厚忠信人莫不敬服爲舉子業不事雕篆馴雅渾厚本源六經最喜春秋手不暫釋年二十八選博士弟子調爲連原察訪明年擢增廣及第後二年薦爲藝文館檢閱陞奉教丁卯之亂扈從江都賞擢六品階爲監察轉司諫院正言司憲府持平以忠直見重出知通津縣公平廉介民歌其惠丙子冬金兵猝至上幸南漢公以侍講院弼善扈世子嬪入江都及城陷

文忠公金尚容登南門樓自燒死公朝服望行在哭  
四拜與父訣遂自殺時年四十八 仁廟賜祭表其  
閭 顯廟贈承政院都承旨嗚呼丙子之難國步倉  
皇智者不及謀勇者不及戰 宗社爲重不得已請  
成圖存遂無一人血膏鋒刃而惟江都一隅忠臣義  
士相率而殉國烈女貞婦相枕而潔身東方禮義之  
風可有辭於天下萬世矣若公則尤有烈焉一室之  
內同日死者九人豈不偉哉配淑夫人慶州李氏贈  
議政時發之女無子惟有一女歸權備公之後遂絕  
備之子愈爲禮曹判書大提學蓋公家自高曾以下

及公身皆以忠孝旌其閭者五世而從曾祖梅臣從  
祖父元麒俱以孝旌三婦女節死江都五世之內旌  
門者十 肅廟時有筵臣仰奏 上嗟異之曰鄭氏  
五世三清白十旌門殆過江左卞氏命置守墓四人  
蠲其徭役國家崇獎之典可謂盛矣今我 聖上尤  
惓惓於江都死義之臣特命不拘爵秩許施易名之  
章公之兄百昌宗孫鈺廣州士人魚致搏安宗楫等  
持公死事本末來請狀于良浩余常慕公節又感多  
士之誠最其大畧以備太常氏之採焉

豐寧君洪公諡狀

公姓洪氏諱寶字汝時號月峰我洪系出安東之豐山縣遠祖諱之慶事高麗高宗魁文科官至國學直學生諱侃號洪崖文章節行爲世所推重累遷至都僉議舍人以直道不容於時貶爲東萊縣令卒于官詩集傳于世生諱侑官密直使大提學生諱演亦官大提學生諱龜官中郎將知麗氏將亡解官歸鄉里路經高陽仍卜居高峰山下世葬其地於公爲六代祖考也高祖諱繼宗司圃署別提贈左通禮曾祖諱禹甸贈左承旨祖諱脩贈議政府左贊成寔是郎將公會孫諱世敬之子而承旨公取以爲後考諱鸞祥

聰悟博學與伯氏大司憲文敬公諱履祥受學於杏村閔先生純并有華聞以詞藝擅名早升上舍屢躋公車卒官刑曹佐郎以公勲追封豐昌府院君贈領議政妣綾城具氏忠義衛禮淵之女 光廟勲相致寬後也萬曆乙酉十一月十一日生公年十三丁內艱執喪如禮旣長從權石洲鞞學石洲器之期以遠到中已酉進士筮仕爲禁火司別坐遷漢城府叅軍乙卯丁議政公憂廬墓終喪時廢朝政亂公絕意仕進挈家歸沔川海曲優遊自適癸亥反正 上首幸太學謁聖試士公擢壯元卽拜成均典籍尋以資窮

例加通政以散秩卑官魁科起家卽紆緋玉世所罕  
有也公用是謙挹求外調自效是冬出守興海郡甲  
子春李适舉兵叛 大駕南遷公卽日出處外廳星  
夜治兵赴亂臨行托妻子於邑中士大夫曰賊不破  
吾死不還矣將士聞者莫不感泣思效中路聞賊敗  
報罷兵秩滿遞還西班丙寅夏奉命餞慰姜王兩詔  
使于定州進止應對咸中于度兩使亟加稱贊慰存  
曰暑月得無勞乎爲除苛禮秋除原州牧使原本巖  
邑而開方伯營困於供應資實單弊稱爲惡地公不  
以介意赴任未久卽有丁卯之變公調度兵糧弗乏

軍興人士之避亂者坌集公捐俸賑給無不稱意秋  
李仁居作亂于橫城仁居本居京城得罪鄉里竄跡  
山僻詭行盜名除官不起驕倨自恣至是見朝廷與  
藩中通使陰懷異志欲乘機射天結集山氓以誅主  
和奸臣爲名因縣道上疏罪狀朝廷辭絕悖逆監司  
崔覲憚其有儒名不敢斥其爲賊而身之旁縣不以  
爲慮仁居遂自稱倡義中興大將矯發縣中束伍盜  
取官庫兵仗放縣囚罪人屯據縣內傳檄州郡聲言  
先往湖西具兵糧器械然後直抵京師檄到原州橫  
城縣監李擢男棄官跳出就公言狀公卽以 上聞

而急調本州兵促夜半進討軍吏皆以爲賊已據險  
本州兵少不可輕入公厲聲曰賊勢未熾猶可撲滅  
若少遲待必益猖獗再言逗留者斬遂定三營將由  
三路進兵賊本烏合聞官軍鼓譟聲洵懼潰散仁居  
猶欲拒戰公并力進薄生得仁居并其子支黨與送  
于京師悉皆伏誅 上下教曰原州牧使洪靈聞途  
豎作亂卽發官兵不日討捕其忠勇功烈古所罕有  
欲爲錄功以褒其忠大臣請召公勘定原人素感公  
惠政陳疏借留不許公累上疏辭避不獲遂錄勲第  
一賜輸忠奮義決策清難昭武功臣號超階正二品

封豐寧君兼都摠府都摠管當叛書之聞也京師震  
動大將領訓局精兵卽日東下送行諸將戒其切勿  
輕易入險以防伏兵湖嶺闔帥或有持疑不卽進兵  
者則公以一麾之任聞兵卽行孤軍獨進而不顧忘  
身殉國之節誠有如 聖謨所獎者明年正月柳孝  
立等謀亂於湖界凶謀尤慘幸而發覺伏誅獄辭果  
有與仁居相連狀則公於其時勦剪機牙使不得交  
併作奸其功又曷可少哉時虜屢求我國歸正人廷  
議茅靡公獨奮然引古事以折之議雖不行國言躋  
之已巳春差毛都督接伴使時朝廷疑毛將有異心

毛將亦怨朝廷待遇寢薄勢久阻隔侵撓多端伴使當久留接應或辭疾不行故公不敢以不能辭旣赴島察其無佗卽具狀以聞且以誠信相接都督大喜未久毛將赴寧遠衛被害公亦輟歸拜京畿監司未幾遞辛未春出爲全州府尹時以元宗大王追崇屢送使价未蒙允許壬申又當遣使奏請上曰今茲使臣必極擇以送廼可準請於是特差公正使召自全州特拜左叅贊攝銜議政遂從海道朝天時貢路新改使行滄没人多憚行規免公怡然就道畧無幾微見於言色或有慰之者公曰天風海濤豈必能

死人哉吾當仗忠信安義命而已行至覺華島猝遇暴風幾致顛覆舟中人盡怖無人色公獨焚香端坐指揮篙師賴以利涉及還風勢便迅嘗一日千里國人以爲神助其在帝京也孔子之後衍聖公胤植禮部主事聞標見公風儀深相敬服托以心契多與酬唱公又以使事至誠懇告蓋追崇之典專由禮部故得以竣事旣復命仁廟大悅命超階崇政賞賚甚渥復拜左叅贊冬拜刑曹判書踰年而遞仁烈王后之喪差守陵官丙子之難從間道趨江都丁丑陵制畢例加崇祿戊寅清人將攻錦州衛徵三萬兵

於我朝廷欲遣使緩之而難其人遂舉公而應之三日而發行人皆謂此行必蹈不測之危公不危之行到鳳城 昭顯世子 孝宗大王自瀋中察知虜意遣人中途止公行曰彼已議戕害使臣以威示我國今來必無幸矣其勿入一行失色相顧不甯行公獨曰我受命 君父而來寧有命止我乎策馬促進及到虜帝果大怒使十王子者來 世子館所立 世子庭下旁設凶器盛氣詰問使臣公不少撓極言我國被兵後兩西空虛一卒不可得兩南則方有日本窺覬之憂又不可悉賦而從虜固以日本爲意迺徐

問日本事情公歷陳可憂狀始令減其半公又苦爭之遂以三千約送鄭命壽繼到館所言曰是行決不免焉今卒無事意者使臣必福人也仍具道初來危怕之狀聞者悚然蓋公爲國效死之志臨事應變之智皆此類也歸拜刑判遞拜漢城判尹己卯復爲刑判庚辰復爲叅贊判尹辛巳春拜叅贊辭遞壬午病癱久未瘳 上委御醫救視續賜藥餌至翌年癸未十二月三日卒壽五十九訃聞賜祭及葬如禮贈大匡輔國崇祿大夫議政府領議政兼領經筵弘文館藝文館春秋館觀象監事 世子師豐寧府院君甲



申十一月十二日葬于燕岐縣東鳴鶴里丁坐癸向  
之原 肅宗壬申移窆于同面箕管洞庚坐配貞敬  
夫人咸安李氏生員晟之女生一男柱世有文章盛  
名生員文科官至正郎知製教女二人婿韓山李正  
源衿川姜文井俱進士側室一子柱石正郎男一女  
二男萬宗進士僉樞婿都事全州李箕章郡守南陽  
洪受寅李正源男一女二男李雲慶婿睦天成丁時  
潤僉樞男二重呂重斗重呂無子以重斗之子台輔  
爲後台輔男一女二男達漢婿全州李時澈德水張  
至泰達漢男三女一男樂韶樂謨樂護女坡平尹箕

東公天性孝友自少竭力奉養於衣食所安不以進  
父兄則不敢一日自享家人見其至誠惟公意是承  
伯兄家尤苦貧多子女不能自立公與之共財不問  
出入閨門之內和氣藹然推而至於遠近親戚恩意  
周徧救災恤急婚喪有資莫不厭意焉歷典劇郡京  
兆秋部號爲難理公自布衣驟陞未曾經歷事務而  
處之沛然判決狀奏矢口如流文不加點詞意俱暢  
其爲治平恕不擾而吏不能欺見朝論携貳標榜隨  
立杜門守靜謝絕勢利於是非得失泊然無嬰以此  
仕宦常在通塞間其出守奉使名爲擇遣而實爲時

議所左而然也公一心夷險聞命輒行常遇坎而亨人皆異之嗟乎以忠信之行順受勞謙固宜獲天佑也記性兼人才識通透每念時事艱屯間與相知之深者論說得失其言鑿鑿中窾嫻於辭令敏於應對其於文藝初不著工而自得於才格者爲多平居樂與親友觴詠娛適而未嘗沉酗及褻於聲色也寢疾期年形消骨立而精神猶不爽謂子弟曰吾位至正卿年垂六旬死生常理復何恨也命遷席正寢屏去婦人翛然而逝家人遵禮治喪歛用深衣幅巾用遺命也嗚呼公不假吹噓自致亨衢履滿思懼惟務抑

遜絕迹於衆趨之地頽然若無能故世之知公者蓋寡雖號知公者徒以爲寬厚長者而不知公才諳之蘊操行之高矣其行已事國之大節較然可據非可誣也始澤堂李公撰公易名之狀而未及付太常澤堂遽歿例不得按其文而請焉其後屢易世公之後孫轉徙鄉曲尙未乞文於館閣今公六世孫樂韶以良浩備官太史齋澤堂舊文及清陰金公所撰碑春沼申公所述狀來托重焉世代旣遠事蹟難詳而三公者皆先輩名碩也其言可徵而信故畧加點綴而附以子姓之後出者敘次成文謹告于太常氏

耳溪集卷三十八

終

我王考文獻公詩文全集五十卷它經藝雜著之  
零編剩簡各自爲書者又四十弓叢書二十二編  
總百有餘卷蓋府君所以積學累工海涵澤聚于  
以鳴一代之盛貽百世之傳者此其全鼎也府君  
於晚年摒擋巾篋手削其什之三四選古今體詩  
序記雜文彙類繕次命小子相役凡爲十八卷而  
餘皆未定稿也及夫壬戌小子罹終天之痛號擗  
之餘寓慕於遺書更取疏劄碑誌及館閣應酬之  
作合編爲三十八卷又訂外集十二卷繕寫校對  
以待鋟版而事鉅力絀藏在箱篋倏已四十星霜

矣記昔小子年纔勝冠侍我王考奉筆研隅坐每  
有著作輒命小子執筆口呼手未停而篇已就又  
命善聲而讀之笑曰能壽傳先世著述其惟能讀  
父書之子乎至今追惟恍若隔晨而小子年今七  
旬矣桑榆之景冉冉將盡大懼夫一朝溘死此事  
遂無寄托亟以選本用聚珍字擺印而若夫全集  
及叢書諸編留俟嗣刻嗚呼凡我世世萬子孫尙  
克念之哉癸卯仲春不肖孫敬謨謹識



